



DISSERTATIO INAUGVRALIS MEDICO - CHIRVRGICA.
DE
OSSIVM INFLAMMATIONE.

CAP. I.
DE INFLAMMATIONE IN GENERE.

§. I.



Sis corporis humani æque facile incendium concipere, atque alias ejusdem molliores partes, velut torosas & membraneas, &c. iis exploratissimum fore, qui non studium modo suum in ossium structura perlustranda unquam collocaverint; sed ejusmodi quoque ossium morbis interfuerint, ubi occulta inque interioribus horum recessibus latitans mali vis, convulsis osseis repagulis, intus erumpens, vicinas partes foede devastavit, mihi haud difficulter persuadeo. Verum enim vero ferme crediderim, hæc illis *παράδοξα* visum iri atque a vero alienissima, quibus persuasum est, non ullas alias corporis partes, præterquam sic vocitatas sanguineas, incensionis esse patientes; exsanguis vero, velut cartilagineas, osseas aliasque id genus, singulari quodam privilegio, inflammatione prorsus esse exemptas. At vero me vix contineam, quin ita existimantibus dicam planius atque apertius, genuinam ac veram phlegmones naturam non satis sibi esse perspectam, alioquin, ipsa penitus intellecta, facile cognoscerent, non esse ullum uspiam in corpore humano punctum,

Etum, si ab epidermide, unguibus & pilis discefferint, quin ad inflammationem concipiendam foret accommodatissimum. Atque quo facilius hunc erroris nodum, quo non paucos Medentium, nec sane indoctorum, etiamnum videmus implicatos, exsolvamus, expediet heic magis dilucide ostendere, 1) inflammatio quæ sit & quomodo accendatur? 2) quæ sit ossium fabrica? Ex his intellectis nullo fere negotio exstruere nobis licebit, 3) quo pacto ipsis ossibus inflammatio accendi queat?

§. 2. Neglecta hujus morbi *ὀνοματολογία*, ipsam inflammationis notionem hoc loco tradere placet. Est igitur hæc validior justo ac velocior sanguinis arteriosi in canalibus minimis attritus *a)*, sub celeriori ejusdem per hos trajetum contingens, ob nativam aliorum ejusdem arteriosi trunci ramulorum diametrum, quomodocunque imminutam, occlusam aut destructam, cum dolore, calore ac febris semper, in mollioribus autem partibus tumore præterea & rubore stipatus.

§. 3. Jam vero ut, quæ hac definitione comprehensa sunt, explicatiora prodeant, non alienum erit singulas in ea obvias voces, quæ lumen clarius desiderant, dilucide expedire, quo liquidius appareat, in quo inflammationis cardo potissimum vertatur. Sustinet vero nostra in definitione generis vicem attritus vocabulum, quippe quod ad veram incendii formam atque indolem declarandam omnium est appositissimum. Quod si enim sedatiori neutramque in partem inclinante animo phlegmones ingenium contemplemur, omni luce clarius nobis pernotescit, eam nihil omnino in humorum stasi seu perfecta quiete consistere, ut multorum opinio fert; sed contra in concitatori & quasi prærapido eorum per minimos vasorum surculos motu, sub quo exiles cruoris moleculæ usque adeo inter se mutuo colliduntur & agitantur, ut inde nimium incalescant, sicque incendium concipiant, quod, nisi in tempore extinguatur convenientibus auxiliis, vasculis disruptis & destructis, in vicinas partes latius se diffundit. Possem omnino magnam vim observationum atque copiam, quæ hoc evincunt, in medium proferre, animus si mihi esset longius excurrendi, quam dissertationis limites permittunt: argumento omni exceptione majori nobis esse possunt ecchymoses seu sugillationes, ubi cruor ex suis tubulis, undecunque divulsis, effusus & congelatus sub cute invulnerata subsistit & quiescit, ne ullo quidem inflammationis vestigio apparente. Idem hoc quoque in aneurismatibus arteriarum cuiusvis obvium est, ubi sanguis in dilatato arteriæ sacco hæret concretus per longinquum temporis spatium, sine ulla tamen, nec levissima quidem, inflammationis nota. Nec dissimile quid nobis spectare licet in ita dictis venarum varicibus, ubi cruor in suo ad primam scaturiginem recessu impeditus, circa ipsarum divergia moram necit, (unde etiam venæ ibidem in tortuosos atque indolentes assurgunt tumores,) nullo incensionis indicio comparente.

Quæ

a) BOERHAAVIVS *Aphorism. de cognosc. & curand. morb.* §. 371.

Quæ quum ita sint, cuius luculenter patescit, cruoris stasin non ullo stabili argumento pro inflammationis efficiente venditari causa, experientia contrarium ostendente.

§. 4. Sciscitanti vero, qui fiat, ut incendium excitetur in corporis partibus, illud facile innotescit, cogitatur, qua ratione aliis corporibus, igni concipiendo atque alendo habilibus, ardor atque adeo flamma conciliari queat. Res quippe multorum oculis testator est, ignem, quin apertam sæpius flammam vel iis in corporibus suscitari posse, ubi eum delitescere nec conjectura quidem aliquis prospexisset, dummodo validius atque velocius aliquandiu inter se invicem atteruntur & concutiuntur, quo mutuo affricu usque eo haud raro concalescunt, ut, mutua illa arietatione diutius continuata, ignescant, quinimo, si flammæ alendæ apta, flammam hauriant. Experimenta quoque illa, a BOYLÆO, BOERHAAVIO aliisque eo consilio capta, ut veram ignis naturam nobis sisterent exploratam, abundantissime docent, solo mutuo corporum quorumcunque inter se attritu ignem, prius inobservatum, quovis tempore, produci posse *b*): testimonio nullo alio luculentiori, caloris omnis essentiam in solo concitatori materiæ cujusdam subtilissimæ, ipsis corporibus inclusæ, motu maxime niti, qui, prout varie augetur atque intenditur, modo caloris, modo ignis aut flammæ cieri nomine solet. Jam vero quum omnis inflammatio, humano in corpore orta, ita salutetur a similitudine effectuum, quos cum vulgari igni habet communes; similium vero similes dentur rationes, ac proinde quoque haud dissimiles causæ efficientes: nihil quoque dubii esse potest, quin quodvis partium corporis incendium cum vulgari igni ex communi fonte emanaret; nec aliter, nisi gradu, ab ignis forma distaret. His itaque perspectis, non obscure intelligetur, quid causæ mihi fuerit, quamobrem attritus voce in mea de corporis incendio definitione usus fuero.

§. 5. Quo autem liquidius constet, qua via sanguini, fortiori illo attritu, calor nimius in affecta parte induci queat, non abs re fore duco cruoris genium heic breviter expendere, ut inde eluceat, quo significato in nostra inflammationis definitione accipiatur. Ex Physiologicis perspicuum est, purpureum vasorum liquidum gemino sensu medicinam facientibus intelligi, latiori scilicet & angustiori. Illo denotat liquorem rubicundum, externa specie sui ubique similem, re autem vera dissidentis ingenii partibus constantem, velut fluidis ac solidis, levibus & gravibus, agilibus ac minus mobilibus, globosis, angulosis & compluribus aliis, quem corporis vasa qualiacunque suo coercent complexu, inque motum profluum agitant: hoc vero per sanguinem intelligitur congeries particularum grate rubentium,

A 2

sphæ-

b) BOERHAAVIVS *Element. Chem. Tom. 1. de igne. Exper. IX. Coroll. 1. & 3.*

4
sphærica figura c) præditarum, quæ tantillæ sunt exiguitatis, ut singillatim non, nisi armato visui, compareant, & reliquis in vasorum alveis hærentibus liquidis admixtæ, colorem illum rubrum, in cruore ex vena pertusa educto obvium, inducunt. Prior sanguinis significatio in nostra definitione locum obtinet, utpote cruorem stricte sic dictum, serum, lympham, & si quid aliud istis, simul sub se comprehendens.

§. 6. Experimentorum beneficio, a Viris omni laude majoribus institutorum, constat, purpureas cruoris stricte sic dicti moleculas, ex multis aliis sphæculis, magnitudine multo inferioribus, nec rubicundis, sed flavescentibus esse conflatas, quæ extra nexum & mutuam inter se cohærentiam in vasis corporis provolutæ, feri nomine salutantur d). Has vero flavescentes sphæculas serosas itidem ex pluribus aliis minoribus corpusculis, non flavis, sed pellucidis esse coagmentatas, quæ similiter a suo mutuo nexu in libertatem vindicata, lymphæ nomine venire solent e). Neque dubium est, quin hæc quoque rursus ex aliis multo minoribus particulis sint concinnata. Quousque vero hæc particularum in subtiliores divisio pergat, nullius ingenii vi determinare integrum est.

§. 7. Hæc vero, quæ de sanguine proprie sic dicto jam commemoravi, non ficta esse & commentitia; verum reapse ita inveniri, facile reperiet, sanguinem in vasis diversorum animantium, velut pisciculorum, araneorum, lacertarum aquaticarum, ranarum; &c. vel humanum quoque, tubulo vitreo capillari exceptum, qui microscopiis inspexerit; viderit enim clarissime purpureos in iis circumvolvi globulos, qui diaphano innatant liquido: quemadmodum quoque hæc non minus eleganter, quam docte, pro suo more, demonstrata tradidit, nitidissimum orbis literati fidus ac rei Medicæ ornamentum, *Illustris* FRID. HOFFMANNVS, *Præceptor ac Mæcenus* summa observantia ad urnas mihi sancte venerandus f). Coccineas vero has cruoris sphæculas ex partibus, nequaquam rubris, sed subflavis esse compositas, quæ iterum ex aliis tenuioribus, non flavescentibus, verum perspicuis componuntur, multis egregiis experimentis cum sanguine, recens e venis detracto institutis, testatum fecit *Doctissimus* BOERHAAVIVS

§. 8. Perspecto animalis liquidi ingenio, in eo jam est, ut brevissime quoque ejus vasa coërcentia attingamus. Vsu atque observatione exploratissimum est, non esse ullum uspiam humano in corpore punctum, quin vasculis, quamvis a visu occultatis, abundaret: vix quippe ullus in omni corpore

c) BOERHAAVIVS *Instit. Med.* §. 226. DOMINIC. GVLIELMINVS *Exercitat. de sanguin. natur. & constit.* §. 46, usque ad 50.

d) BOERHAAVIVS *loc. cit.*

e) *Idem eod. loc.*

f) *Medic. Rat. Syst. Tom. 1. Libr. 1. Sect. 1. Cap. V. §. XXIV. in Schol.*

pore locus invenitur, qui acicula quadam Lanciatus, non illico liquidum funderet, argumento, omnium oculis testatori, vasorum furculos ubicunque pullulare. Idem quoque hoc comperimus, vena quavis arteriave in vivo animali pertusa vel vulnerata, cruorem scilicet citatiori flumine ex inflicto vulnuscule erumpere usque eo, donec animans, vitali liquido prorsus exhausto, interierit. Sic quoque observamus, ceram igni liquatam, infiori arteriæ vel venæ ramo, velut iliaco, carotidis aliive, si fuerit infusa, inde continuo in tenerrimos quosque, vel ultimos ipsorum furculos, diffundi. Perspicimus ergo his experimentis, vasa ad unum omnia, vel minima, arteriæ magnæ trunco & venis cavis esse connexa, ita ut sanguini aditus ex alio ad aliud sanguineum vas pateat liberrimus.

§. 9. Experientia itidem constat, vasorum sanguiferorum ramos in propagines sensim sensimque graciliores discedere, quæ tandem usque adeo gracilescunt, & tantillæ evadunt, ut nec conspicio quidem collustratæ, sub aspectum cadant. Connectuntur autem tenerrimi arteriarum ramusculi cum ejusdem magnitudinis canalibus venosis, nullo interveniente medio, neque glandula, neque folliculo, nec alio quodam ipsis simili, sed immediate. Hoc omnium oculis testatum faciunt ipse eorum per microscopia obtuitus in vivis animalibus, injectiones, ligaturæ vasorum. Liquida ergo in corpore animali universa e corde, tanquam prima scaturigine, systaltica ipsius vi, expulsa, evolvuntur in appensos arteriarum aortæ & pneumonicæ alveos, unde simili motu, in his æque atque omnibus aliis ramis, inde porrectis, assiduo micante, diffunduntur in cunctas ceteras arterias, usque ad minutissima quæque harum incilia, quæ sanguinem acceptum in venulas, anastomosi sibi insertas, transferunt, ex quibus in ramos, pedetentim capaciores, regreditur, donec tandem in commune sanguinis compluvium, unde profluxit, reiectus fuerit.

§. 10. Hic sanguinis in orbem motus, quem paucis quidem, sed nostro fini sufficientibus, jam explicatum dedi, est illa, & apud veteres, & apud recentiores Medicorum, celebratissima corporis natura, quæ, quemadmodum a sapientissimo ædificii humani conditore ita in corpore constituta, ut non possit non structuræ ipsius & legibus mechanico-hydraulicis sibi præscriptis convenienter agere: sic etiam non inepte sapientis cognomine salutar. Hujus quippe beneficio noxia & impura, ab utilibus & delibatis segregata, per tam innumera dissidentis fabricæ emissaria e corpore ejiciuntur; morborum vel acutissimorum vis vincitur & subigitur; obstructions in corpore contingentes recluduntur; inflammationes vel discutuntur, vel, eo in cassum cadente, ad suppurationem perducuntur, & omnia alia vitæ & sanitati conservandis inservientia perficiuntur: circulo enim sanguinis vigente, & æquabiliter, temperate nec interrupte per corporis vasa progredien-

te, vitam sanam adesse: eo autem utcunque offenso & turbato, valetudinem labascere & periclitari, quin, prorsus extincto, vitam amitti experimur.

§. 11. Jam vero quum in nostra statuatur definitione, incendium in vasculis arteriosis maxime excitari, de his minimis vasorum furculis me hoc loco dicere oportet, rectius ut cognoscatur, quid causæ subsit, cur liquida, ad subtilissimos vasorum canales delata, ibi tam expedite incendium concipiant. Ex ante dictis jam satis constat, eam esse omnium vasorum habitudinem, ut, quo longius a suis truncis recedunt, in eo minores sensimque subtiliores abeant furculos, qui denique adeo tenerascunt & remollescunt, ut a tomenti specie non multum abludant; unde quoque est, cur solertissimo RVYSCHIO vasa tomentosa, pulposa vel succosa nominantur. Ostendit prætea laudatissimus Auctor, minimas has vasorum propagines in quavis ferre corporis parte, figura ac reptatu, a se invicem dissidere, ita ut in renibus, verbi causa, vermium in modum reptarent *g*); in hepatis vero corpore in elegantes fasciculos rotundos & quasi stellatos colligerentur *h*); in liene penicillorum speciem præ se ferrent *i*); in corticali τὰ ἐγκεφάλῳ substantia tenerrimæ lanuginis habitum induerent *k*), sicque in cunctis reliquis partibus aliam faciem ostenderent. Quanta vero & utilitas, & necessitas hujus in tantillæ diametri canaliculos divisionis vasorum fuerit, cuivis facile apparebit, perpensuro diversissimas illas, quæ sanguinea in massa fluitant, partes, quarum quædam ea sunt natura, ut, ni tempestive e corporis canalibus extrudantur per convenientia incernicula, sed remaneant, solidis æque ac liquidis labem inferant: aliæ vero, velut sanguis stricte sic dictus, serum, lymphæ &c. quæ corpori nutriendo & tantæ sanguinis copię continenter servandæ inserviunt, quanta ad canales replendos & sanguinis circuitum continuandum necessaria est, ita sunt comparatæ, ut, iis quomodocunque nimium imminutis, corruptis, vel e suis canalibus effusis, sanitas quinimo ipsa vita jacturam faciat. Quomodo ergo fieri posset, ut tot tamque diversa liquida, in humorum massa sibi invicem promiscue intermixta & confusa, a se invicem sejungerentur, nisi vascula subirent tantillæ tamque diversæ capacitatis, quæ nihil, nisi quod ipsorum diametris respondet, intromittant, excludendo omnia, quibuscum sibi nulla intercedit proportio.

§. 12. Quanquam vero vasorum minimorum tanta est differentia, ut nemo mortalium eam ad unguem definire valeat; sagacissimus tamen BOER-

HAAVI-

g) *Thesaur. Anat. IV. Tab. 1. Fig. 1. & Prædrom. Thes. Anat. VI. Tab. 1. Fig. 2. 3. & 4.*

h) *Thesaur. Anat. IX. No. LIX. p. m. 30.*

i) *Epist. Anat. IV. Fig. 1. 2. & 4.*

k) *Epist. Anat. XII. Tabul. 14. & 15.*

HAAVIVS omnium primus, perspicuis sane argumentis, demonstravit, minimos vasorum ramusculos, quotquot dentur, commode ad quatuor genera referri posse, velut ad vascula sanguifera, serosa, lymphatica & denique secretoria atque excretoria. Longior profecto in differendo essem, quam dissertationis ratio fert, cuncta, quæ in hanc rem dici possunt, hoc loco expromere conaturus, idcirco, brevitati studens, remittam B. L. ad ipsos fontes, unde hæc omnia longe dulcius hauriri possunt. Nobis heic tantum sufficiat indicasse, quadruplicia hæc vasorum genera, quamvis visui inarmato non patescant, tamen non posse negari, quum non ratio solum eorum existentiam luculenter arguat, sed ipsa quoque experientia confirmet: observamus enim aliquando tunicæ oculorum adnatæ in ophthalmiis, a sanguine, serosa & lymphatica ejus vascula ingresso, colorem induci ruberrimum, in qua tamen, vigente oculi sanitate, nihil ruboris conspicuum erat, argumento inexpugnabili, hanc oculi pelliculam jam antea utique vasculis minimis, nullo liquido purpureo irriguis, verum alio quodam latice perlucido perfusis, redundasse, quæ nunc demum, oculo præter naturam affecto; coccineo liquore referta, visui nostro sese offerunt conspicienda. Idem hoc quoque nobis ostendunt omnes aliæ aliis in partibus inflammationes, ubi ante incensionem paucissima comparebant vascula, cruore rubicundo distenta; suborta vero phlegmone, tanta vis vasorum rubore conspicuorum ibidem deprehenditur, ut ea intuentem in admirationem rapiat. Nec dissentiunt hac in re a *Doctissimo* BOERHAAVIO, Viri ab omni laude feliciores, *Illustris* FRIDERICVS HOFFMANNVS *l)* & Candidissimus RVYSCHIVS, qui in eo tantum discedit, quod hæc vasa serifera & lymphatica passim suis in monumentis chylo-serosa appellaverit *m)*.

§. 13. Prius vero quam rationem reddamus, cur attritus sanguinis in exiguis potissimum exoriatur arteriis, neutiquam vero in amplioribus, neque in venis, quantumvis minimis? expediet præmonere, sanguinem minime uno eodemque velocitatis gradu, per universos aortæ ramos, ad ultima quæque ferri, verum per singulas arteriarum sectiones, sibi ex ordine succedentes, lentius moveri versus extremitates. Quum enim celeritas nihil aliud, nisi modus, quo movendum certo tempore per determinatum propellitur spatium; hydraulicis vero legibus constet, velocitatem liquidi in ramis, ab uno eodemque trunco profectis, posita summa orificiorum horum ramorum majori, ostio illius trunci, per quod ingreditur, semper quoque minorem fieri; autopsia porro anatomica compertum sit, quemvis arteriæ ramum in complures alios ramos abire, quorum orificia, in unam summam collecta, semper majus & amplius ostium efficiunt, quam diameter trunci est,

l) Medic. Rat. Syst. Tom. III. Sect. 1. Cap. IV. §. XII.

m) Advers. Anatom. Dec. II. Ill. p. 7. & VIII. p. 20.

est, unde exporriguntur: omni luce clarius inde apparebit, cruorem in ramis lateralibus nunquam non multo tardius circumagi, quam in eorum truncis. Ergo quoque in minimis vasorum furculis omnium tardissime protrudi. Nec difficile erit hoc clarius intelligere consideranti conicam vasorum figuram, ut quæ itidem influxuro sanguini impedimento est, quo minus satis libere ea permeare possit. Vt in præsentī taceam plura alia, quæ vitali liquido, minimos vasorum ramulos petitulo, remoram injiciunt, sicque ejus progressum retardant.

§. 14. Pronum jam erit perspectu, cur sanguini præcipue in minimis arteriarum tubulis tantus caloris gradus accendatur. Quod si enim expendamus, qua via inflammatio excitetur, inveniēmus, in ea semper humorum stagnationem aut stasim perfectam in aliquibus vasorum ramis præsto esse, quæ ergo sanguini, obstructos hosce canales perluere alias solito, obicem ponunt, eundemque ab ingressu excludunt: hinc necesse est, ut liquidum ad alios ejusdem trunci ductus sanguineos ruat: quemadmodum in Hydraulicis nobis animadvertere licet, canali uno alterove non satis patente aut plane interrupto, aquarum flumen ad alios patentes transferri; quum autem commemorati sanguinei canales, licet aperti, tantam cruoris molem neque capere, neque satis expedite transmittere valeant in venulas sibi connexas, necessum hinc est, ut motus celeritate resarciatur, quod vasorum capacitati deest; dum itaque sanguinis globuli per tot tamque admirandæ exiguitatis canaliculos, torrentis ferre in modum, propelluntur, non aliter fieri potest, quam ut validissime & inter semet ipsos mutuo collidantur, & vasorum lateribus fortius & citatius atterantur, sub quo attritu ita incalescunt & incendium concipiunt. Jam perspicuum erit, qui liquido vitali in minimis arteriis calor conciliari queat. Si porro consideremus stupendam minimorum vasculorum exiguitatem, eorum conicam figuram, varium reptatum, inflexionem & curvaturam, tandemque tardissimum, quo cruor ex ultimis ramulis urgetur in venulas socias, motum; liquido apparebit, cur hæc vascula, præ omnibus aliis iisque conspectioribus, facile obstruantur; unde postea in iis, quæ hiulca & pervia relicta sunt, sanguini, eadem citatiori motu pervadenti, tantus æstus conciliatur. Sin vero expendamus, venulas ex spatio angustiori semper in amplius ac patentius dehiscere, ideoque ingredienti eas liquido nihil obstare, sed potius aditum ad eas patere liberri- mum, clare nobis cernetur, quare venarum soboles & ab obstructionibus, & consequenter ab inflammationibus quoque immunes sint.

§. 15. Jam in eo est, ut breviter attingamus causas illas, quæ hoc in partibus corporis incendium tam concitant, quam alunt: persuadeo enim mihi, iis recte perspectis, clarius quoque intellectum iri, quo modo ipsa ossa inflammatione corripi subinde possint. Ex his itaque primum jure sibi vindicat

cat locum, formalis causa quæ in scholis Medicorum dici solet, quam in solo concitatori & fortiori partium sanguinis inter se attritu ac mutua arietatione, neutiquam vero earum desidia & requie sitam esse, disertis verbis jam supra significavimus. Efficiens autem hujus affricus in tenerrimis vasorum propaginibus causa, est illa omnium sermone in scholis Medicorum celebrata corporis humani natura, quam admirabilem illum sanguinis circuitum, ab alternante vi cordis & vasorum systaltica & diastaltica profectum esse, in antecedentibus pronunciaui: quippe hoc motu liquores, vasorum alveis coerciti, perenni flumine ad ultima quæque vascula urgentur. In censum denique causarum προκαταρτικων, ut quæ fluidis, ad minimos vasorum ramusculos protrusis, occasionem offerunt a via quasi regia deflectendi, inque alios vicinos & pervios canaliculos ex obliquo, majore vi ac mole, irruendi, sicque inflammationem in parte corporis ægrotante commovendi, veniunt ea omnia, quæ aliquibus vasorum, ramis vel stagnationem humorum, vel perfectam stasin seu obstructionem inducere valent. Hæc vero quum pæne sint innumerabilia, mihi autem constitutum sit, hoc loco de inflammatione duntaxat agere, quatenus ad dicenda planius perspicienda confert; iis heic ordine recensendis, quæ vasorum capacitatem vel arctare, vel penitus occludere valent, sciens volensque supersedeo, ablegando B. L. ad BOERHAAVII egregium librum de *Aphorism.* ubi in capite de *obstructionibus* ad satietatem de his occasionalibus causis differit. De materiali quoque incensionis causa, utpote cuivis per se manifesta, nihil attinet dicere.

§. 16. Jam perspicuum fore existimem, quam longissime ii a vero aberrant, opinantes, summam omnis inflammationis ac formam maxime, quin unice, in sola tantum vasorum obstructione, & liquidorum a motu cessatione esse positam: si enim hoc verum, scire pervelim, qui fieri posset, ut in parte incensatantus tamque acerbe haud raro urens æstus oriretur, quum tamen ex Phisicis constet, calorem non ulla alia ratione, nisi validiori & ocyori corporum inter se concussu atque attritu, provocari posse, quippe quo materia illa ignea, in corporum interioribus occulta delitescens, cuiuscunque ingenii sit, in rapidiorem motum agitur, quæ hoc pacto excita, corpori calorem plus minusve sensibilem accendit. Nec obscurum inde erit, quid argumenti eorum habeat sententia, qui intestinam partium sanguinis fluidarum agitationem pro inflammationis vera genitrice agnoscunt; si hoc ita esset, nulla appareret ratio, quamobrem curor, in vasis insignioribus, velut aorta, venis cavis, pulmonali, arteria hæmorrhoidali externa, sinu duræ matris sagittali &c. subsistens, quemadmodum nobis animadvertere licet in aneurismatibus, polypis venarum, tuberculis illis ani exitum obsidentibus &c. non æque incendia ibi suscitetur, atque in minimis arteriosis canalibus.

Hæc proinde quum ita sint, verius asseveramus, omnis inflammationis formam atque essentiam consistere in celeriori ac fortiori mutua globulorum sanguineorum arietatione & affricu, quem sustinent, dum majori copia & citiori motu per minimos arteriarum furculos percurrere coguntur.

§. 17. Expensuri vero, quænam causa sit, quamobrem vitalis latex copiosius in lateralia arteriarum vascula irruat, eademque velocius transmigrat? semper inveniemus diametrum canalium quorundam, aut nimis angustatam & diminutam, aut prorsus oppilatam esse, ita ut sanguini, eos ingressuro, omni introitu interdictum sit, qui ergo per laterales hos furculos, vel nimium arctatos, vel plane obturatos, pervadere præpeditus, in alios ejusdem trunci ramulos, itidem laterales, at pervios, vi cordis & arteriarum systaltica adigitur: quum vero hi tubuli neque tantæ cruoris moli capiendæ, neque satis expedite transmittendæ pares sint; hinc necesse est, ut velociori transcurso compensetur, quod vasorum capacitati deest. Ergo non aliter fieri potest, quam quod globuli sanguinei, sub rapidiori hoc per aperta vascula trajectu, inter se fortius collidantur & agitentur, quinimo vasculorum parietibus se atterant: unde oritur ille in omni incendio obvi-
us calor: dum vero hæc quoque vascula majori sanguinis copia simul obruntur, sicque nimium diducuntur, in villis ipsorum nerveis, hoc pacto immoderatus pressis & tensis, nascitur dolor; & in mollioribus corporis partibus si hæc contingunt, assurgit eo ipso tumor cum rubore conjunctus. Febris denique, individua inflammationis comes, quæ pro loci, in quo incendium hæret, ipsiusque inflammationis diversitate, modo acerbior & intensior est, modo remissior & mitior, ex sola pulsus arteriarum velocitate cognoscenda, exoritur a fibris arteriarum irritatis & immodice extensis. En tibi incensionis genium, breviter hic quidem, fini tamen nostro sufficienter, explicatum: cognosces inde, cur inflammatio commemoratis in nostra definitione symptomatibus semper stipata incedat, nec suboriri queat, nisi stagnatio liquorum vel stasis in canalibus quibusdam minimis inhærescat: cave tamen, existimes, summam inflammationis in his consistere; quum dilucide expedierim, eas duntaxat inflammationi accendendæ viam pandere. Intelles quoque singulas, quæ in tradita definitione leguntur relatæ, notiones, utpote ex jam dictis satis perspicuas. Perspicias etiam universis corporis partibus, quibus vasa intexta sunt, inflammationes accidere posse: quia incendium non, nisi in vasorum alveis succenditur, nec fieri posse, ut aliquis ipsum extra sanguinis conceptacula sibi vel animo tantum fingat.

§. 18. Explanata itaque inflammationis natura, reliquum est, ut dispiciamus, qualis tandem exitus partium corporis incensionem maneat. Observatione compertum est, quamlibet inflammationem vel resolvi ac discuti, vel in abscessum desinere, vel in gangrænam, &, nisi satis mature huic

malo prævertatur, in sphacelum abire, vel denique, si partes potissimum glandulosas occupaverit, in tumorem prædurum, at indolentem cedere, *σκιρδόν* Medicis dictum. Primus igitur inflammationis eventus, qui omnibus ceteris antecedit, est resolutio, quæ nihil aliud est, nisi ea partis inflammatae mutatio, qua vascula obstructa in loco incenso recluduntur, & cruor iisdem inclusus & progredi impeditus, in libertatem vindicatur, ita, ut sui juris iterum factus, in motum profluum & circularem revertat, evanescentibus cunctis, in loco accenso antea conspicuis symptomatibus, nec ulla labe in parte offensa remanente.

§. 19. Si perpendamus, qua arte natura corporis humani occlusa vascula referat, sicque humores in iis stagnantes, vel plane subsistentes, in motum reducat; ipsa causa, canales sanguineos arctans, & iisdem stagnationem humorum vel stasin arcessens, nobis est præponderanda: hæc quippe si extra vasorum cava sedet, & inde ipsorum nativam diametrum, comprimendo, intorquendo, distorquendo, contundendo, crispando, distrahendo &c. angustat & diminuit, quemadmodum fit a tumoribus vasis incumben- tibus, fracturis & luxationibus ossium, ligaturis & compluribus aliis; quisque, vel me silente, videbit, frustra hic a sola corporis humani natura staseos discussionem expectari, nisi auxiliante periti cujusdam chirurgi manu ea amoveatur. Quod idem quoque intelligendum de materia quadam peregrina, velut calculosa, sebacea, omnique id genus alia, vasorum surculos obstruente intusque in ipsis canalibus latitante, utpote suo- pte ingenio inidonea movendo, & per corporis tubulos circumagitando, ubi ergo omnia naturæ conamina, itidem plane irrita erunt atque inania. Non obscure igitur hinc intelligetur, ad liquidorum stasin, in vasis quibuscunque, a natura corporis humani vincendam & discutiendam requiri, 1) ut ea sit restitanti- um liquorum habitudo, dividi se in subtiliores partes ac dissipari ut sinant, hac enim deficiente, omnis conatus ad irritum cadet: 2) ut ipsis vasculis, in quibus humores requiescunt, spatium extrorsum cedendi seque rur- sus contrahendi relinquatur satis liberum, quippe vel hoc desiderato, resolutionis negotium difficillime succedet: 3) ut liquida, per arterias ad canales obstructos systole cordis & vasorum advecta, satis blanda, diluta, fluidissimaque sint atque omnis acrimoniæ salinæ expertia, alias tenerimis vasorum propaginibus facile vim inferunt: 4) ut tandem motu moderate ac- celerato & placido ad locum inflammatum accedant: quia alioquin, si rapi- diori vi, torrentis in modum, eo ruant, exigua hæc & mollissima vascula destruunt atque evertunt, id quod eo certius continget, quo acriores ægro- tans suis in canalibus alit humores, aut alio pacto corruptos. His ergo conditionibus in corpore præsentibus, nihil dubitationis est, quin resolu- tio staseos perbelle sit naturæ cessura.

§. 20. Jam in eo est, ut consideremus, qua via sanguinis in minimis vasculis immoti consistentes globuli, suis vinculis naturæ corporis humani beneficio exsolvantur, inque libertatem asserantur. Efficitur autem hoc sola cordis & arteriarum systole & diastole, alternis sibi succedente, qua sphærulæ sanguineæ, in tubulis serosis & lymphaticis arteriosis peregrinantes, laxatæ ex suis canaliculis excutiuntur & in motum rediguntur. Sciatur vero sanguinis globulos, five mole auctos, five alia ad movendum minus apta figura indutos, five alio modo corruptos, aut ex loci errore vascula peregrina ingressos, subsistere vel in horum initiis, vel altius iis intrusos, in ipsorum medio aut finibus. Si globulorum stasis in vasorum introitu hæret, hoc modo a natura auferri eam, veri videtur simile. Dum cruor ex sinistro corde systoles ope in quoscunque arteriarum ramos, vel maxime exiguos expellitur, arteriæ omnes in diastolen abeunt; corde vero ad diastolen redeunte, arteriæ contra eo ipso omnes se contrahunt, ideoque ipsi etiam obstructi arteriarum ramuli, eodem temporis puncto, se arctare conantur: quorum ergo latera, propius ad se invicem accedere nitentia, hoc temporis, conquiescentes cruoris globulos, singulis arteriarum ictibus, premunt, urgent & foras trudere adnituntur: undi hi globuli, in horum vasculorum introitu commorantes, arteriarum vibrationibus, toties reiteratis, pedetentim vinculis suis relaxantur & de suo loco dimoventur, qui sic expediti, quum minimos hos canales, ob conoidem figuram, semper capacitate decrescentes, pervadere vix possint, arteriarum minimarum renixu, sub diastole cordis, retruduntur cor versus, & hoc pacto in venulas sanguineas, proxime ipsis obvias refunduntur. Quod si vero globuli pedem fixerint in medio vel extremis horum vasculorum, natura iisdem mediis ad illam stasin utitur auferendam: quippe sanguine, a cordis vi systaltica appulso, arteriæ omnes, ideoque etiam occlusæ, diducuntur; unde globuli in iisdem intercepti aliquantillum versus canalium apices protruduntur; corde autem ad diastolen revertente & arteriis in systolen abeuntibus, a lateribus canalium, quibus infixi hærent, semet itidem contrahere conantibus, paululum cor versus repelluntur inque pristinum locum rediguntur: hoc ergo alternante arteriarum systaltico & diastaltico motu, assidue continuato, interclusi sanguinis globuli, singulis arteriarum vibrationibus, ultro citroque truduntur, sicque sensim in massulas multo minores dividuntur & conteruntur, quæ hac via a mutuo suo amplexu divulsæ, comminutæ, & ipsa vasculorum obseratorum amplitudine longe minutiores redditæ, nunc (quum vasculorum fines, ob diminutam molem suam, pervadere possint,) in motum circularem abiguntur inque venulas, obstructis vasculis connexas, propelluntur. Ecce tibi admirabile hoc mechanicum, quo sapiens natura ad stases humorum tollendas utitur, artificium, brevius heic explicatum, quam
 tanta

tanta res dici possit. Data opera hoc loco tacitus præteribo illos mechanicos staseos resolvendæ modos, quibus medicamenta, ad eam dispellendam a foris adhibita, agunt; quia de resolutione atque inflammationis extinctione hic dixero, quatenus solius naturæ beneficio atque efficacitate eam perfici nobis subinde animadvertere licet, neutiquam vero artificis ope, ne dissertationis modum excedam.

§. 21. Resolutione vero incassum cadente ob quascunque causas, ab inflammatio suppurando in abscessum, qui alter est, quem habet quandoque, exitus, ubi cuncta, indivulso comitatu incendium comitari solita in parte ægrotante symptomata, magnopere invalescunt: tumor sensim altius assurgit, ruborque in partibus incensis mollibus intenditur, æstus evadit ferventior, dolor asperior & tristior, quin ipsa febris aucta corpus perurit acerbius. Tum minima in loco inflammato diffeminata vascula, abundantiore humorum, nunc stasin radicibus defixam altioribus alluentium, vi ac mole obruta, & proinde immoderatus distenta, quum tantæ cruoris copię nec capiendæ & coercendæ, nec transmittendæ sint, incipiunt in suis lateribus fissuras seu rimulas agere, initio tenerrimas, per quas deinceps particulæ cruoris, omnium fere subtilissimæ, velut alibiles lymphaticæ, exstillant in vicinas intercapedines, tum vero; paulatim magis diductas & hiantes, effunduntur quoque partes sanguinis ferossæ, tandemque etiam ipsæ rubicundæ sanguineæ, quæ universa in unum locum paulatim aggregata & collecta, instratam quoque cutim sensim sensimque in sublime extollunt, hocque pacto tumorem, gradatim assurgentem, pariunt. Liquida itaque hæc, ex suis perruptis vasorum furculis elapsa, inque commune compluvium usquequaque congressa, ibidem per aliquot tempus detenta, & loci calore assiduo fota, pedetentim in motum quendam intestinum, nescio, quo nomine salutandum, leviter putrescentem, an fermentescentem? abripiuntur, unde aliam, atque ipsis erat, canalibus suis coercitis, naturam induunt. Dum vero effusi hi ex vasorum alveis liquores, inque unum communem locum confluentes, ita subsistendo a pristina indole degenerant, ipsas proxime sibi obvias partes solidas, paulatim correptas, emolliendo, macerando, liquando & depascendo corrumpunt, demoliuntur, inque liquamen quoddam convertunt, quod cum ipsis denique commixtum, illum spissum, album atque inolentem progignit laticem, puris nomine in Medicorum scholis insignitum. Est itaque suppuratio ea inflammationis mutatio, qua liquidum, & obstruens, & inflammans, ex suis vasculis perruptis in vicina paulatim exterminantur loca, ubi consistens, & suæ ipsius naturæ commissum, in motum quendam intestinum abripitur; quo ipsa solida, ibidem consita, sensim absunta, liquefacta, & cum liquidis confusa, inliquamen album, spissum atque inodorum, quod pus vocatur, commutantur.

§. 22. Luculenter ex dictis apparebit, quare, incendio in apostema exeunte, cuncta ei usitata ingravescant symptomata usque eo, donec vasculis diffisis, liquidi nimium hæc distendentis copia ex iis fuerit excussa, quo enim facto, dolor, calor, rubor ac febris retenduntur: quæ, quum ex iis de inflammatione supra expositis facile intelligantur, heic fusius explicare nihil attinet. Quam diu purulenta hæc illuvies in occulto suo & communi latet compluvio, integumentis externis iisque illæsis contacta, tam diu abcessus seu apostematis nomen retinet; quamprimum vero, sepimentis hisce exterioribus intus perruptis & patefactis, sibi exitum aperuerit atque ex suo conceptaculo prodierit, ulcus appellari assolet. Quod si vero huic tabo exitus non maturatur, sed spatium in suis latebris justo diutius morandi, sicque in parte affecta cuniculos agendi concedatur; aut si ulceris apertura adeo angusta & parva, ut puri egressuro vix via exeundi pateat satis commoda, quod in suo specu tum maximam partem relictum, diverticula quærendo partem suffodit & occultos sinus excavat, ulcus vocatur sinuosum: sin autem ipsius ulceris introitus jam occalluere, fistula nominatur. Alias ulcerum differentias, ab iis, quæ non nunquam ulceribus adjuncta sunt, derivatas, unde diversis nominibus designantur, heic de industria omittam.

§. 23. At vero si incensionis in parte inflammata vis, neutra via, modo ostensa, desinat, sed latius se fundat, in gangrænam atque adeo sphacelum erumpit. Hæc vero tum denique oriuntur, inflammatio si corpora incesserit impuris, salinis, acribus & spurcis humoribus redundantia, velut scorbutica, gallico morbo inquinata, idque genus complura alia; aut liquidis spissis & circumducendo per vasa minus aptis prædita; vel viribus effœta & senio pæne confecta, ubi canales tenerrimi ab humoribus illis acribus & corrodentibus, uberiore jam solito copia & citatiori motu in ipsos irrumpentibus, discinduntur & destruuntur; tum liquida, iisdem ante contenta, foras exiguntur, inque circumjecta loca expelluntur, ubi commorando & restando tandem putrescunt, illosque funestos eventus, gradu duntaxat a se invicem distantes, gangrænam scilicet & sphacelum pariunt. Ne vero longior sim, quam decet, breviter horum vitiorum definitiones hic subungere lubet, quo clarius inde intelligantur. Est itaque gangræna ea inflammationis mutatio, qua sanguinis in parte incensa, per vascula ibi collocata, circuitus, maximam partem est extinctus, plurimis ipsorum perruptis, laceratis, destructis & sanguini vehendo plane ineptis reddetis, cum auspicante effusorum ex ipsis ac consistentium liquidorum corruptione, repentina ardoris, ruboris, doloris & tumoris in loco affecto remissione conjuncta. Sphacelus vero est ea inflammationis mutatio, qua omnis humorum in parte morbosa accessus & recessus per vascula, ibi disseminata & discissa sive disrupta, usque adeo interceptus est, ut omnis in ea sensus & motus pereat, cum effusorum ibidemque

que plane subsistentium liquorum putrefactione, & partis demortuæ vastatione, algore, foetore semper stipata. Perspicuum ex his erit, sanguinis qualemunque in orbem motum per vascula quædam esse superstitem in gangræna: in sphacelo contra sanguinis progressum penitus esse per omnes canales restinctum & sublatum: unde hominis ægrotantis vita non ulla alia via conservari potest, quam partis sphacelatæ extirpatione & amputatione; cum in gangræna, si mature convenienti medela succurratur, sanguinis per vasa circuitus restitui sæpius possit.

§. 24. Ultimus tandem, quem inflammatio aliquando perfert, exitus est, qui schirrho nomine venire solet, quo potissimum incensio desinit, glandulas corporis partes si comprehenderit, utpote quarum densior est & magis constipata textura & habitudo; etiamsi nec aliæ corporis partes, ejusdem sint immunes. Consistit autem scirrhus in tumore quodam præternaturali, perquam duro, indolente, frigido & inæquali, a materia quadam concreta, exsiccata atque indurata, in vasis minimis hærente, oriundo, qui undecunque exsuscitatus & exulceratus, in ipsum cancerum apertum, vel ulcera non, nisi exsectione ulceratæ partis sanabilia, sæpius degenerat. Hæc itaque habui, de inflammatione quæ prius dicerem in universum, quam ad ipsam ossium phlegmonem explicandam ingrediar, quo clarius inde & facilius perspicui possit, an & quo pacto ipsis ossibus incendium accendi queat? cognita ergo inflammationis natura, de ossium quoque structura ut quædam præmittamus conveniet, quippe qua, curatius excussa, liquidius iudicare cuivis integrum erit, quemadmodum fieri possit, ut in ipsis ossium penetralibus quandoque incendium oriatur.

CAP. II.

DE OSSIVM FABRICA.

§. 25.

PAulo altius & a capite repetituro ossium natales, atque attentius contemplaturo, quo ex fonte prima eorum elementa ac primordia emanaverint, ea ex colliquamenti liquidis, *αμνιω* inclusis, sicut cunctarum reliquarum corporis partium, item fluxisse atque in mutuos sensim complexus coisse, haud obscure intelligetur, præclara illa de hominis origine observata, quæ in monumentis virorum, ab omni laude feliciorum, HARVÆI & MALPIGHII, memoriæ exstant commendata, si consideratius perlustraverit. His enim compertissimum est, naturam, admirabili sane artificio, prima velut totius futuri animalis corporis lineamenta ducere & quasi adumbrare ex pauxillo liquaminis, ovulo foecundato innatantis, hacque ratione rudi-

rudimenta omnibus inde nascendis corporis partibus ponere : quibus faciem deinceps ac formam paulatim inducit expressiorem, & tandem, quum iisdem, temporis progressu, plus incrementi ac roboris accesserit, ad exactam elegantiam, venustatem & magnitudinem perducere atque expolire, hacque via omne humani corporis ædificium exstruere atque exædificare. Nihil ergo dubii est, quin, vel ipsa minuta tenelli embryonis oscula ad unum omnia, ab eodem liquido rudimenta sua fuerint auspicata.

§. 26. Nemini quoque mirum hoc videri crediderim, diligentius dummodo expenderit, solida sic dicta omnia a fluidis non, nisi quiete, figura & cohæsione dissidere *n*): unde etiam hæc, restincto illo motu, quo ipsorum minima corpuscula, quasi tecte, inter semet invicem continenter agitantur, vique in mutuum eumque arctiorem amplexum ruendi ipsis aucta, facile solidorum induunt naturam. Ex minimis ergo liquoris amnii particulis, antea fluidis, nunc vero quiete solidatis, tanquam ultimis nascendi ossis primordiis, eo ordine, quem HAVERVS *o*), SANTORINVS *p*) HAMBERGERVS *q*) & GORTERVS *r*) dederunt delineatum, inter se connexis & conglutinis, conflatur solidum, oblongum, nec pertusum corpusculum, quod non inepte fibra vocatur ultima. *conf. dissertat. de senum dieta*, sub Præsidio Viri consummatæ eruditionis, *Illustris* IO. HENR. SCHULTZII, Præceptoris ac Mæcenatis, omni honoris cultu ætatem mihi venerandus. Ex his præstructis staminibus, compositissima serie inter se contextis, conficitur planum flexile & plicatile, quod membrana cluet ultima: quæ cylindraceo cavo circumvoluta, vasculum, ex omnibus omnis humani corporis minimum, a nerveo tubulo, vel, si mavis, filamento, nihil omnino abludens *s*), progignit, ultimi vasculi nomen haud indigne ferens. Ultimos ergo hos corporis humani canaliculos qui cum MALPIGHIO & BOERHAAVIO nerveas appellaverit fibras, & pro primis omnium partium cum SANTORINO *t*) staminibus venditaverit, a vero non aberrat. Nec obscure jam indidem cuivis, mente hæc diligentius agitato, liquebit, quid causæ, & MALPIGHIO, & GAGLIARDO, fuerit, quamobrem testatissimis verbis ostenderint, tenerrimas ossium lamellas ex nerveis esse filamentis concinnatas *u*). Ex ultimis ergo jam explicatis

vascu-

n) BOERHAAVIVS *Instit. Med.* §. 443. FRID. HOFFMANNVS *Fundam. Med.* Cap. II. §. 31.

o) *Observat. de ossib.* Serm. V. Cap. I. §. 220. & 221.

p) *Opuscul. de structur. & motu fibræ.* N. VI.

q) *Element. Physic.* Cap. III. §. 190.

r) *Medicin. Compend. Tract.* I. N. VIII.

s) BOERHAAVIVS *Libr. cit.* §. 440. & 700.

t) *Libr. cit.*

u) *Anatom. off.* Part. I. Cap. I. observ. I.

vasculis, elegantiori ordine dispositis & inter semet conjunctis, enascitur pellicula, nequaquam vero fibrata, sed vasculosa; quæ item in orbem contorta & meatu pervio adornata, novum profert vasculum, minime vero minimum, sed ex minimis canalibus constructum. Ex quibus deinceps, pari ratione inter se collectis, sibique mutuo nexis, aliæ conspectiores membranae denuo excuduntur. Membranarum hic ex vasis minoribus contextus; & vasorum itidem ex hujusmodi tunicis, usque eo pergit, dum humani corporis natura, quem in universis corporis partibus fabricandis ac perficiendis intendit finem, esse videtur consequuta.

§. 27. Atque his, in medium nunc prolatis, nihil commentitii fictique, nedum absoni, inesse, (quamvis naturæ minutissima quæque visui, etiamsi optimis microscopiis adjuto crassis occultata & circumfusa tenebris lateant) non fere ullo perspiciet negotio, secum volutaturus, quantæ sit teneritatis & mollitiei embryonis corpusculum, in utero hospitantis; RVYSCHIVS quippe varios pusillos embryones, in suis ipsius conceptaculis, videlicet ovulis adhuc conclusos, deprehendit, qui tantæ fuerunt teneritudinis, ut, præ incredibili mollitie, liquaminis instar difflexerint inque nihilum quasi redacti fuerint, ovulo ipso cæterum sospite ac salvo, & a suo incola omnino vante x). Quid? quod sanctissime asseverat idem ille egregius observator, sibi aliquoties ejusmodi embryones fuisse traditos, quorum tanta fuit subtilitas, ut inter contemplandum liquefcerent y): asservat quoque parvulum embryonis cujusdam corpusculum, ex umbilicali suo funiculo pendens, in quo nonnullæ partes etiamnum satis conspicuæ sunt, reliquis maximam partem liquatis atque in nihilum redactis z), argumento luce meridiana clariori, prima omnium corporis partium, ideoque etiam ossium elementa, initio fuisse fluida atque ex amnii liquido profecta, quæ deinceps admirabili artificio digesta sibique mutuo vinculo nexa, prima totius struendi ædificii humani fundamenta jaciunt.

§. 28. Jam vero si dispiciamus, ossium in foetu facies quænam intuenti ea objiciatur spectanda? liquido apparebit, eorum plurima usque adeo esse mollia, ut membranis quam proxime accedere videantur: quid? quod, si in embryonibus collustrantur, nihil aliud, nisi meras membranas esse, observationibus iis, a RVYSCHIO memoriæ proditis, id clarissime testantibus. Solertissimus enim hic humanæ fabricæ investigator, in foetu bimestri vel trimestri, ossa cranii nudas fuisse membranas, nec dum ullum osseæ texturæ vestigium ostendisse, crebrius reperit a). Id quod compluribus ali-

is ob-

x) *Theaur. Anat. VI. No. XXXIX. & XL. Ibid. No. LXXXI. s.*

y) *Theaur cit. No. XLIII. 3.*

z) *Eod. Thef. No. XCIII.*

a) *Theaur. Anat. III. p. 6. & Catalog. Rarior. No. VI. 1. & Ibid. No. VIII. 1.*

is observationibus adhuc fufius comprobare ex facili mihi foret, per exempla heic ituro. Has vero nascituri inde offis pelliculas, nequaquam esse ultimas, sed impense multis sanguineorum vasorum furculis festive contextas, facile inveniet, ipsa cranii ossa ex infantulo, recens in lucem edito, qui fuismet unquam oculis usurpaverit. Vascula hæc, per futuri offis membranam disseminata, si liquido suo perluciente pedetentim fuerint orbata, vel cum eodem, ipsis inhærente & sensim sensimque congelato, concreta, in filamenta illa vel cartilaginea, vel ossea abeunt, quibus singulæ, in pluribus ossibus, lamellæ compinguntur.

§. 29. Ex osseis his staminibus seu fibris, innumero sane numero sibi-met mutuo instratis, paulatimque exsiccatis atque induratis excitantur variæ osseæ laminæ, quæ sibi mutuo, dispari ordine & numero superinductæ, ipsa tandem ossa fingunt & constituunt. Est vero non eadem & consimilis horum osseorum staminum in universis ossibus directio: quandoquidem in aliquibus, velut cranii, ossibus ab uno in ossium medio hærente puncto sese diffundunt eorum peripheriam versus; radiorum fere in modum, a corpore quodam lucido quaquaversus disperforum *b)*: in aliis vero ossibus, quæ insigni cavo instructa sunt, velut femoris, tibiæ, humeri &c, ab altero ipsorum extremo exporrecta, ad alterum recta & *παράλληλως* excurrunt *c)*. Cogitate autem perhibui, ex osseis hisce fibris bractæas seu lamellas construi, quæ inter semet ipsas, diverso ordine ac numero, conjunctæ & confixæ ipsum ossium corpus seu diaphysin efficerent. De quo qui forte dubitet, ossa is modo inspiciat, quæ, jam a longo tempore alternantibus variis coeli mutationibus atque injuriis offensa, sub dio humi jacuere, ubi inveniet, ea, dicto modo suis liquidis exhausta atque exsucca, negotio minus difficili in plures osseas bractæas diffindi & dissolvi posse. Quod longe etiam expeditius succedit in ossibus, ignis tortura moderate & ad justum duntaxat gradum exustis & calcinatis: omnium vero facillime divelluntur ossium laminæ a sua mutua cohærentia, si Papiniana machina fuerint emollita, hac quippe via, nullo negotio, dimoveri & a se invicem diduci se sinunt *d)*. Sic dicta quoque exfoliatio, quæ ossibus subinde, suo periosteo exteriori denu-datis, usu venire solet, ubi plures sæpius squamas, deinceps deciduas, protrudunt, hoc abundanter evincunt.

§. 30. Quamvis certo certius sit, plurima corporis ossa e variis laminis, initio membranaceis, sensim vero postea induratis vel in cartilagineam, vel in osseam substantiam, ac inter se conjunctis & ferruminatis esse composita: cave ta-
men

b) HEISTERVS *Compend. Anatomic.* §. 73. p. 24.

d) CLOPL. HAVERS *libr. cit. Serm. I. Cap. IV. §. 26.*

c) WINSLOVIVS *Anat. Tom. I. de ossib. exsicc.* §. 89. MALPIGHIVS *Dissert. epist. cit. & Anat. Plant. Idea p. 4.*

men existimes eandem esse omnium humani corporis ossium genesin & fabricationem. Sunt enim, quæ non unquam membranei quid retulerunt, sed tenui mucō, sua ipsius membrana involuto, sensimque in cartileagineam duritiem concreto, unde tandem, progrediente ætate, in osseam abeunt, fuere prognata, velut ossa carpi, tarsi & sterni: hæc quippe nullo tempore membranæ fuerunt, verum ex solo quodam mucō, sensim occalescente, in ossa induruerunt, quemadmodum hoc ita semper in foetibus invenit Vir, inusitatissima Anatomies peritia nulli secundus, Excellentissimus CASSEBOHMIUS, Præceptor & Patronus in primis mihi ætatem colendus. Sunt quoque plurimi Anatomicorum perversa hac in sententia, omnia corporis ossa prius fuisse cartilaginea, quam in osseam naturam transissent; quum tamen, experientia ipsa loquente, cranii ossa nunquam ullam cartilaginis speciem exhibuerint, sed, omissa & neglecta cartilaginea natura, proxime ex membranis in osseam duritiem & ingenium transmigraverint.

§. 31. Luculenter ergo ex dictis elucebit, eum frustra operam esse sumturum, qui illa ossa ex ejusmodi mucō, tanquam primis ipsorum incunabilis orta, in varias lamellas diffindere conatus fuerit. Pervestigaturus vero illa ossa, quæ reapse compluribus lamellis, sibimet mutuo incumbentibus, coagmentata sunt, iis caute diffractis, reperiet, harum bractearum series in diversis ossibus admodum quoque esse diversas & dissimili ordine digestas. Namque in ossibus, insigni quodam specu, medullæ recondendæ apto, intus adornatis, velut tibiæ, femoris, humeri, cubiti &c. eo ordine sibi mutuo instratæ spectantur hæ laminæ, ut exterior & superinducta semper longius excurrat & procerior sit ea, quæ ipsi proxime subjacet: quæ gradata bractearum sibi incumbentium porrectio atque increscens longitudo, per omnem ipsarum seriem, pergit usque ad extimas, cæteris omnibus substratis obductas: extrema ergo ossea strata, quæ ossium fistulosorum superficiem candida crusta operiunt exteriorem, omnium sunt longissima: quum ex adverso ea, quæ intime locata hærent & ipsam medullam proxime cingunt, ex cunctis sint brevissima.

§. 32. Longe aliter res se habet in iis ossibus, quæ innumeris cavernulis seu forulis in suis penetralibus sunt instructa, & unico vasto cavo destituta, velut in cranii ossibus, quippe quæ itidem per pluribus osseis bracteis, alia alii superinductis, constant; ubi exterior ac superior lamina semper ætioribus terminis circumscripta conspicitur, quam quæ huic proxime jacet substrata seu inferior: hinc quoque in foetus craniiis margo bractæ inferioris semper observatur aliquantillum prominentior, limbo superstructæ laminæ osseæ. Unde liquido apparet, plana ossea exteriora in cranii ossibus, velut frontis, bregmatis &c., quo longius ab infima lamella ossea recedunt, eo semper evadere contractiora & minora. Extimam ergo ossium cranii lamellam

28
mellam omnium esse minimam : sicut e contrario infima horum ossium lamella, ipsas cavernulas, binis cranii tabulis interjectas, proxime contegens, inter cunctas reliquas est maxima ; Excellentissimo CASSEBOHMIO in suis lectionibus Anatomicis hoc ita sæpius demonstrante. Hinc quoque primum est judicare, cur ossium fistulosorum parietes, in sui medio, nunquam non multo crassiores sint ac densiores, quam in suis extremis, HAVERO id præclare admonente e).

§. 33. De industria hoc loco tacitus præteribo DOMNICO GAGLIARDI opinionem de mutua harum lamellarum cohærentia, quam peculiaribus quibusdam osficulis, easdem inter se ita configentibus, acceptam esse ferendam, & sibi met ipse, & aliis perperam persuaserit f); neque eorum sententiam heic perquiram, quibus persuasum est, diversa illa ossium strata singulari quodam osseo succo, ceu ferrumine, præter illos osseos, quos jam commemoravi, clavulos, ad se invicem adjungiatque agglutinari g), quinimo ipsis osseis filamentis tantam duritiem atque osseam rigiditatem ab eodem circumfuso sensimque concrescibili osseo latice induci h); quum innumera sane argumenta, rationis & experientiæ fulcris suffulta, hocque loco data opera reticenda, ejus existentiam funditus convellant: verum ad ipsa ossium penetralia collustranda ingrediar, utpote quæ dicendis atque inde deducendis plus luminis foenerant.

§. 34. Ante vero quam ad ossium interiora perscrutanda aggrediamur, in rem nostram erit distinctionem Anatomicis usitatam adferre, qua dispe-
scuntur in ossa fistulosa, & cavernosa seu spongiosa. Illa vocantur, quæ intus excavata & perquam conspicuo sunt instructa cavo, medullæ concludendæ accommodato : hæc vero, quæ hujusmodi quidem antro concavo destituta, ipsius vero loco innumeris exiguis cellulis seu cavernulis intus sunt donata, quæ oleoso quodam & rubello succo perfunduntur. Inspecturo itaque ossis cujusdam fistulosi, velut cruris vel femoris, compagem, secundum ipsius longitudinem dissectam, triplex se substantia offert conspicienda. Una, a qua suam potissimum stabilitatem habet ac soliditatem, ipsius osseos fingit & format parietes: altera, quæ innumerabilibus cellulis & cancellis, admirabili artificio constructis, & mutuis aperturis inter se connexis, constat, (propterea quoque substantia cluet cellulosa seu spongiosa) in hujusmodi ossium extremis intus sedem figit suam: tertia denique, reticulata WINSLOVIO dicta, intimam horum ossium cavi partem eamque mediam sibi vindicat, ubi in facie ossei parietis interiore admodum conspicua est.

§. 35.

e) *Libr. cit. Tab. 1. Fig. 1.*

f) *Libr. cit. Part. 1. Observat. II.*

g) *Idem Ibid. Observat. VIII.*

h) *M. MALPIGHIVS Anat. Plant. Idea p. 4.*

§. 35. Prima igitur substantia, qua magnum ossi intus insculptum cavum, tanquam osseis moenibus cingitur, ex osseis laminis, densissime stipatis atque inter se arctissimo nexu conjunctis, excitata est; quarum ea est collocatio, ut gradatim evadant breviores & ab ossium extremis retractiores, in ossibus nominatim fistulosis: ex quibus interiores, prout sensim longitudine decrescunt, a reliquis superstratis exterioribus bracteis discedendo interiora versus deflectere, cumque oppositis totidem osseis stratis, similiter reflexis, sibi que mutuo obviis, committi atque uniri ab HAVERO dicuntur i). Ex mutuo hoc laminarum ossearum, ab oppositis ossis parietibus profectarum coniugio, illud cellulosum seu cavernosum, quod in utroque ejusdem ossis fistulosi extremo conspicitur, opificium oriri, idem ille Auctor testis est k).

§. 36. Quanquam vero harum strues cellularum elegantes referre videtur cancellos, ob plures fibrillas osseas, cellulis intertextas, sibi que mutuo passim implexas: nullo tamen negotio cuivis, intentioribus eas contulenti oculis, animadvertere licebit innumeras, ipsis osseis filamentis intersertas esse exiles cavernulas seu cellulas, interjectis osseis sepimentis nitide a se invicem interstinctas, ita ut unaquæque cellula, suis ipsius parietibus osseis circumsepta, parvulae cujusdam quasi cistellulae speciem efficere videatur. Maxime vero annotari dignum est, cuicunque cellulae suas esse aperturas, unde non medulloso solum succo, in iis recondito; sed ipsis quoque vasorum, per subtilissimum cujuslibet cavernulae periosteum internum distributorum, furculis via, ex alia in aliam, patet satis expedita. Hæc eo magis hoc loco mihi monendum existimavi, quo plus luminis intricatis ossium morbis, in cellulosa hac ossium textura persæpe occultatis, affundunt.

§. 37. Tertia tandem ossium substantia, quæ reticulata est, in magnis ossium fistulosoformis cavis, medullæ complectendæ & recondendæ destinatis, occurrit, ubi interiorum ejusmodi specuum superficiem investit. Structura ejus, quæ a retis cujusdam non multum abludit, cum pluribus osseis ac tenuibus filamentis, diverso ordine inter se contextis, constat. Est præterea opus hoc reticulatum multis diversæ magnitudinis foraminalis, retis cujusdam maculas festive referentibus, pertusum, quæ totidem pæne exiguum canaliculorum, oblique in magnum ossis cavum hiantium, ostiola esse videntur: tenui quippe specillo, ipsis intruso, aditum ad perexiguos quosdam & occultos aperiunt meatus, per aliquod spatium excurrentes, qui cuncti in spectabile ossis cavum, medullæ coercendæ dicatum, oblique suis ostiolis patent.

§. 38. Sunt præterea ossibus varia pororum & meatuum genera: quorum

C 3

i) *Libr. cit. Serm. I. cap. V. §. 50. 51.*

k) *Lib. cit. Serm. I. Cap. IV. §. 33. Tab. I. Fig. I. & Cap. V. §. 55.*

rum illi oleoso seu medullosa pingui ex parte vehendo & per isam ossis compagem distribuendo inservire videntur: hi vero vasorum sanguineorum, & periostei externi propagines, tam ad solidam ossium substantiam, quam ipsorum penetralia & interiores recessus transmittunt. HAVERVS duo pororum genera, ossibus assignavit, quorum quosdam per osseas laminae ex transverso penetrare, & a cavo ossis magno profectos per totam ossei parietis crassitudinem, transverso quidem itinere, sed non ita directo, ad usque exteriorem ipsius pertingere faciem, diserte perhibet *l*): alios vero intra ipsas ossium bracteas, via recta, ab altera ossis extremitate ad alteram ferri *m*). Priori ipsi dicuntur transversa; posteriores vero longitudinales. De poris strata ossium transverse perforantibus, lubens fateor, esse tantæ eos exiguitatis, ut vix in oculos, licet optimis conspiciillis armatos, incurrant: mirari ergo satis nequeo, qui fieri potuerit, ut HAVERO, tam compositissima serie digesti, comparauerint; quum tamen neque Solertissimo WINSLOVIO, neque Perspicacissimo CASSEBOHMIO, ita, ut ab HAVERO descripti fuere, unquam occurrerint. Verum magis demiror, quomodo DOMINIC. GAGLIARDVS osseos suos claviculos in poros hos, usque adeo exiles, vixque electissimis microscopiis conspicuos, adigere, hocque pacto ossium bracteas inter se configere valuerit *n*), a cuius tamen opinione, Vir, cæteroquin minus credulus, Doctissimus MORGAGNVS non adeo abhorreere videtur *o*).

§. 39. Quamvis vero hæc transversa ossium spiracula, per quæ medullosi quid ad ossium exteriora in sanitate exhalare fertur, visui minus obvia sint: multa tamen eaque præclara eorum in ossibus præsentiam testatum faciunt documenta. Quod si enim ossium quodvis, adhuc recens & medullæ plenum, suoque externo periosteo prorsus degluptum, in aprico quodam vel alio loco calido locaveris, usque dum medulla inclusa liquecat, oculis, vel inermibus, usurpare tibi licebit, quomodo hi pori liquatam medullam exsudent; quam si curatissime perterseris, in eodemque loco reposueris, osse hoc recalescente, idem tibi spectare integrum erit. Quoties hoc experimentum tibi reiterare volupe est, toties quoque eadem in eodem hoc osse observare poteris, usque eo dum maxima medullæ in ipso reconditæ pars fuerit excussa: argumento vix ullo testatiori, utique ossis compagem ejusmodi poris redundare *p*).

§. 40. De poris intra ossium bracteas, secundum ipsorum longitudinem ductis, hic nihil attinet dicere, quum non facile ullus, qui de illis dubitet.

l) *Libr. cit. Serm. I. cap. IV. §. 34. & 35.*

m) *Eod. loc. §. 37.*

n) *Libr. cit. Part. I. Cap. I. Obs. II. & III.*

o) *Advers. Anat. II. Animadvers. XXV. p. 55.*

p) *WINSLOVIVS Libr. & Tom. cit. §. 107.*

bitet. Restat itaque, ut de iis quædam meatibus hoc loco subtexamus, qui vasorum sanguineorum ramis, & compactam ossium substantiam, & horum medullam subeuntibus, transitum concedunt. Horum meatuum foramina in ossium superficie, potissimum fistulosorum, visui facile obvia sunt: multo tamen frequentiora offenduntur in ossium extremis, quam in media ipsorum regione. Exemplo nobis sit os femoris, ubi foramina horum ossium ductuum, quæ canales sanguineos ingrediuntur, circa hujus ossis cervicem, magna copia deprehenduntur, nec non in extremitate ipsius inferiore: longe autem rariora in hujus ossis corpore occurrunt. In ossibus vero cavernosis vel, si magis arriserit, spongiosis per omnem ipsorum faciem exteriori disseminata cernuntur. Hoc vero omnium maxime notatu dignum est, hosce meatus nunquam via recta, verum semper obliqua, per osseum corticem descendere; neque omnes ad ossis vastum penetrare cavum, sed complures intra osseas lamellas deferri ibidemque occultari.

§. 41. Cognitis ergo illis viis, quibus sanguinis rivuli ad ossium parietes æque ac medullam deducuntur; operæ pretium erit ipsa quoque sanguinea vasa, quæ ossium parietes ingressa, in ipsorum sese abdunt interiora, hoc loco contemplari, quippe quæ in ossium incensione utramque fere paginam faciunt. Ossa quæque suis ipsius vasis, & advehentibus, & revehentibus, non minus scatere, quam cunctas corporis alias partes, non sana solum ratione perfacile intelligi potest, sed experientia etiam suffragante ab omni dubitatione vindicatum est. RVYSCHIVS quippe, admirandis suis vasorum injectionibus, evidentissime demonstratum dedit, ossa itidem, ut molliores corporis partes, sanguineis vasis esse instructissima: in ipso enim patellæ meditullio, ossea ejus crusta perite scienterque prius ablata, tam incredibilem vasorum sanguineorum, miniata cera confertorum, nactus est abundantiam, ut intuenti eam admirationem injiciat *q*). Quid? quod quum sanguineos crassæ meningis canales ceraceo fartu implevit, factum est, ut injecta materies, per illas vasorum duræ matris propagines, quæ cranii tabulas intrant frequentissimæ, in ipsam osseam cranii substantiam se diffunderet *r*), argumento non ullo alio illustriori, vasa per omnem omnium ossium fabricam quam numerosissime esse disseminata. Alter, qui huic succedit, testis locuples est Cl. HAVERVS, qui aperte fatetur, sibi contigisse vasorum furculos, vel in solidissima quaque ossium parte, atque adeo intra osseas ipsorum lamellas decurrentes videre, & per insigne spatium proficere *s*). Et, quamvis in quibusdam ossium partibus ne vestigium quidem alicujus vasis san-

q) *Advers. Anatom. Medic. Chirurg. II. II. p. 3. & seqq.*

r) *Thesaur. Anat. maxim. No. CCVII. p. 30.*

s) *Libr. cit. Serm. I. Cap. VI. §. 60.*

sanguinei appareat, ea tamen vel in albissima ossium cortice, semper adesse, dummodo in ossibus juniorum investigarentur *t*).

§. 42. Vasa vero hæc ossium laminis abundantissime esse intexta, idem ille Præclarus Auctor recte colligit ex illa insigni ἐνχυμωσι, quam in osse quodam solido ac perfecto, atque illa quidem eius parte, quæ naturaliter alba esse ipsi videbatur, invenit *u*). Neque his abludit ipse WINSLOVIVS, testatissimis ostendens verbis, sanguineos ductus, filorum tenuium instar, per foraminula in exteriori ossium facie conspicua sese insinuare in solidam eorum substantiam, in qua, secundum ossis longitudinem, intra osseas fibras proserperent *x*). Quæ, quum tam sint clara, tam explorata, ut oculis judicari queant, cuicunque satis esse persuasum credam, cuncta corporis humani ossa item, ut omnes molliores partes, in quavis sui parte, vel durissima quaque, vasis exuberare sanguineis.

§. 43. Est autem HAVERVS ea in sententia, arterias venasque, ossis compagem ingressas, minime sese in suo itinere concomitari, verum unamquamque, solam atque incomitatam, iter suum per ossis texturam emetiri: luculentioribus quippe verbis tradit: quamlibet arteriam, a vena socia destitutam, per suum ipsius foramen, in ossium se substantiam immergere, ea scilicet in extremitate eorum, quæ a corporis trunco propius abest, a qua deinde incomitatam pergere ad alterum idque oppositum ossis extremum, ubi in venam defineret, quæ ergo in extremitate ossis, a trunco corporis remotiore, itidem per suum peculiare foramen, ex osseo munimento, emergeret. Verum enim vero Excellentissimus CASSEBOHMIVS, qui corporum dissecandorum peritia nemini cedit, omni mihi asseveratione affirmavit, se semper invenisse, arteriis in recessus ossium interiores sese recondentibus, venas æque comites hæerere, quæ per unum idemque in osse foramen, hujus substantiam subirent, & individuo comitatu per ipsam se comitarentur, atque in omnibus aliis corporis partibus: quicum etiam WINSLOVIVS *y*) & DOMINIC. GAGLIARDVS *z*) concinunt. Feruntur autem hæ vasorum propagines non intra ossium modo bractæas satis frequentes; sed ad eorum cellulosa quoque struem, intus latitantem, ubi ramulos cuicunque cavernulæ impertiunt: Doctissimus enim CASSEBOHMIVS, non tantum suis in lectionibus has, in cellulosa ossium substantia progerminantes vasorum surculos, perspicue videndos exhibuit; sed omnium fere primus quoque demonstravit, quomodo sanguinei hirivuli ex alia in aliam semper cellulam, per mutuos harum aditus, pro-

t) loc. cit.

u) Eodem loco.

x) Libr. cit. Tom. I. Tract. de oss. recent. §. 79.

y) Libr. cit. loc. cit.

z) Libr. cit. Part. I. Obs. VI.

serpant, seque hoc pacto per universam cellularum congeriem diffundant. Sunt præterea perplures vasorum rami, tam arteriosi, quam venosi, qui per osseum corticem delati, ipsam medullam adeunt.

§. 44. Exposito itaque osseo cortice, quanta fieri potuit brevitate, in eo jam est, ut ipsam quoque medullam, quæ ei inclusa, tanquam nucleus inhaeret suo putamini, lustremus. Usitatum est Anatomicis eam discernere in medullam κατ' ἐξοχήν sic dictam, quæ in specu duntaxat ossium confidet fistuloso, velut humeri, cruris, femoris &c; & succum medullarem, qui in cavernulis seu forulis cellulosa delitescit substantiæ, tam ossium fistuloso, quam spongioso, satis fluidus est & coloris rubelli. Medullam hanc a reliqua corporis pinguedine non, nisi loco & teneritate tantum dissidere, ipsa loquitur experientia: est quippe innumerabilium congeries folliculorum, tenerrimis membranulis constructorum, & inter se invicem ita connexorum, ut via ex alio in alium pateat, qui naturaliter oleoso liquamine, per arteriolas eo delato, & quiete aliquantulum crassescere foeti ac turgidi sunt. Omnes hæ vesiculæ medullosa obvolvuntur membrana communi, quæ summæ est teneritatis & periosteum cieri solet internum: quia interiorum ossei corticis ambitum succingit, eidemque infinito vasorum capillarium numero adnexa est a). Patefecit quippe RYVISCHIVS, hanc prætenuem medullæ membranam vasculis sanguineis usque adeo affluere, ut, iis cæra rubra distentis, tota rubescat b): imo, quod magis mirandum, incomparabilis ANATOMICUS CASSEBOHMIUS periosteum hoc internum, vasculis sanguineis irrigatum, in ossiculorum auditus, mallei scilicet & incudis cavitatibus omnium primus detexit c).

§. 45. Succus vero ille, medullaris qui vocatur, in iis membranaceis vesiculis colligitur, quæ ossea cellularum sepimenta investiant, ipsisque pro periosteum interno inserviunt: est enim unaquæque ossea cellula intus admirandæ teneritatis pellicula, veluti peristromate, obtecta, cui permultæ vasorum sanguineorum propagines conspiciuntur intextæ, quæ per mutuos ipsarum hiatus, quibus ex alia in aliam, proxime ipsi adstructam, itur, e suis cavernis prorepæ, in alias semper feruntur. Per eosdem quoque cellularum exitus ipsi medullosi etiam succo, in his forulis, periosteum interno obductis, diversanti, via aperitur suis cavernulis exeundi, atque in alias transmigrandi. Neque silentio prætereundum censeo, hanc medullæ circumvolutam communem membranam æque atque illam, quæ cellulas osseas convestit, acutissimo sensu pollere, WINSLOVIO id præclare admonente d), qui cum

D

a) WINSLOVIVS *Libr. & Tom. cit.* §. 74.

b) *Theſaur. Anat.* IX. No. XIII. 3. & *Theſ. Anat.* X. No. CLXXXII. Tab. III. Fig. II. lit. C.

c) *Tract. de Aur. human. Tract. IV.* §. 142.

d) *Libr. & loc. cit.* §. 78.

cum RVYSCHIVS quoque consentit, hanc membranam, ajens, undecunque atque undam illuvie arrosam, dolores movere acerbissimos *e)*, testimonio satis luculento, interius hoc periosteum fibris nerveis, utpote omnis doloris procreatricibus, esse dotatissimum. Nemo quoque hoc facile dubitabit, expensurus, ingemiscere aliquando ægrotos atque adeo ejulare vi ac magnitudine dolorum, quos in imo sibi ossium meditullio hæere & distinctissime sentiri, quæribunda voce significant, cujus non ulla esse alia videtur causa, atque hoc internum periosteum, RVYSCHIO id sæpius animadvertente.

§. 46. Quaquam rei naturæ convenientius egisse viderer, de periosteo exteriori si statim ineunte hoc capite verba fecissem: consulto tamen ab hoc ordine deflexero; quia pauca tantum habeo, quæ in præsentia de hoc ossium involucro dicam: malui idcirco ea hoc loco subnectere, quam aliis, ad dicenda rectius intelligenda magis necessariis, præmittere. Universa corporis ossa, si a dentium parte, supra gingivas eminente, & illorum ossium extremis, quæ per laxiores ad motum commissuras inter se connectuntur, discesseris, membrana mediocriter quidem crassa, sed perquam valida & transparente circumvestiuntur, quæ subtilissimis fibris, & nerveis, & tendineis, tam dense est contexta, ut vix se extendi patiatur, quid? quod sensu pollet adeo exquisito, ut undecunque, vel distenta, vel alio pacto gravius afflicta, impensos sane dolores progignat *f)*. Est insuper tam insana vasorum sanguineorum in hoc ossium tegmine redundantia, ut vix credibile foret, nisi RVYSCHIVS ea suis injectionibus in aprium protulisset: vasculis enim ejus rubicunda cera effartis, coccinei panni illud induisse faciem, aperte testatur *g)*.

§. 47. Hoc ossium velamen, quod externam eorum superficiem immediate circumplectitur, ab interiore sua facie, ossium convexitatem respiciente, innumeras protrudit propagines membranaceas, capillaribus vasculis & nerveis surculis instructissimas *h)*, quæ per exigua, in ossium ambitu obvia ipsis foraminula, in ipsam osseam sese insinuant compagem, ubi sanguinea hæc vascula, a membranaceis his productionibus eo delata, osseas lamellas interluunt. Involvit insuper venas atque arterias conspectiores, ad ossium interiora contendentes, quas eo comitatur *i)*. Liquido itaque ex adductis apparebit, id utilitatis hanc membranam ossibus præstare, ut non sanguineos solum ramos, uberrima copia ossium penetralia & abstrusiores recessus intran-

e) *Thesaur. Anat. X. No. CLXXXII.*

f) WINSLOVIVS *Libr. cit. Tom. I. de recent. off. §. 60.*

g) *Epist. Anat. V. p. 6. Tab. V. Fig. 1. & 2. & Epist. Anat. II. Tab. II. Fig. 3. It. Advers. Anat. Tab. II. Fig. 8.*

h) WINSLOVIVS *loc. cit. §. 62.*

i) D. GAGLIARDVS *Libr. cit. loc. adduct.*

intrañtes, suffulciat & affectetur; sed ipsos quoque nerveos surculos eodem adducat: hinc quoque WINSLOVIO non absonum fidei & a vero alienum videtur, certas ossium portiones aliquo sensu, quantumvis perquam obtuso atque hebeti, quem ab nerveis hisce propaginibus haberent, esse präditas ^{k)}, cui nec HAVERVS adversum tenet, diserte pronuntians, ossa sensu quodam interno esse donata, ita ut in sua non modo membrana, sed sua ipsius quoque substantia sentire dici posset ^{l)}. Verum enim vero exorsam telam vix ac ne vix quidem pertexere mihi liceret, cuncta, quæ de hoc ossium involucro juxta atque ipsorum fabrica dici possent, expromere conaturo: sufficiat ergo nobis eorum structuram nostro fini convenienter hoc loco explicasse: ea quippe intellecta, proclive erit judicare, utrum ossa inflammari queant, nec ne? id quod quo clarius perspiciatur, ipsi ossium inflammationi nos accingamus excutiendæ.

CAP. III.

DE OSSIVM INFLAMMATIONE.

§. 48.

Postquam itaque veram cujusvis inflammationis indolem ac formam habemus cognitam, nec non ipsorum ossium fabricationem, nullo negotio vel solius tantum sanæ rationis usu intelligemus, nihil obstare, cur incendium ossa eorumque partes non æque facile comprehendat, atque alias corporis partes. Etenim quum ex supra traditis in confesso sit, incensionem in omnibus iis corporis partibus, quæ sanguineis largiter irrigatæ sunt rivulis, suscitari & sufflari posse; explicata vero ossium fabrica exploratissimum sit, ea locupletissimo vasorum penu omnino esse instructa: non quoque ulla ulli erit dubitatio, quin pariter inflammari queant, atque omnes aliæ corporis partes. At vero curatius qui expenderit eximiam illam, quæ cunctis ossibus, præ aliis corporis partibus, priva est, duritiem cum sensu adeo hebeti atque obscuro, (periostea ipsorum si exceperis) conjunctam, ut, an hoc nomine dignus sit, affirmare verear; nullo sane is negotio perspiciet, in causa hæc potissimum esse, cur phlegmone ossium interiora si obsederit, non tam clavis signis luceat ac phænomenis, quam si in partibus, acrius sentientibus, resederit; verum tam obscure atque occultissime quandoque serpat, ut vel perspicacissimo cuicunque Medentium vix ac ne vix quidem integrum sit, abdite latitantis incendii vim ac fomitem subinde pernoscere.

§. 49. Atque quid opus est verbis & argumentis, molesta sedulitate,
D 2 ad

^{k)} *Libr. cit. loc. eod. §.*

^{l)} *Libr. cit. Serm. I. Cap. III. §. 21.*

ad inflammationem ossium stabiliendam, usquequaque conquisitis, ubi rerum adsunt testimonia, omni luce clariora atque illustriora, quæ quemcunque de ea dubitantem convincunt: ALEXANDER quippe BENEDICTVS perspicuis tradit verbis, in muliere quadam, gallico morbo interemta & ab obitu, fontis, unde malum profluxit, perquirendi gratia, dissecta se invenisse, ossa sub membranis suis quidem integra, at tumentia & ad medullam usque suppurata, ea duntaxat ratione, quoniam & ipsa nutrentur, & abscessibus ob id adficerentur *m*). Cui alter locuples testis, MONTVVS succedit, *quandoque*, inquit, *in suppurationem transit coxendix, quem transitum in calceolario Viennæ & vidimus & curavimus n*). Nec abludit illis BENIVENIVS, *inventus est*, ajens, *pestifer humor in coxa, quo magna pars ossis erosa, etiam in cinerem versa videbatur o*).

§. 50. Omnium vero evidentissime probavit, in ipsis aliquando ossium abditis atque adeo medullis, incendia exoriri, quæ, nisi tempestive & decenter reprimantur, haud insolenter in suppurationem contenderent, celebratissimi nominis Vir, IOANN. LVDOV. PETIT, qui inusitatissimum quoddam affert exemplum, quo non facile aliud ullum illustrius. Dicit enim, se aliquando homini cuidam, lue venerea polluto suppetias tulisse, qui verum abscessum, prævia quadam inflammatione natum, inque ossis femoris interioribus reconditum gessisset; & quamvis ipsi, ad malum hoc radicitus extirpandum, mercurialis salivatio, non sine insigni levamine & ipsius foedæ luis expulsionem, fuisset adhibita, tantum tamen abfuisse, ut acerbi dolores, qui, profligata lue, in hujus ægrotantis ossibus superstites remansere, a salivatione confecta siluerint, ut contra quatuordecim post diebus, sensim invaluerint cum febre accedente. Quod vero maxime animadversu dignum, est, quod ipsum femoris os inflammatum externa sua facie rubicundum apparuerit, & manibus contrectatum, vehementer doluerit; eo tandem terebra chirurgica perfosso, ut ad ipsius penetralia aditus remediis pateret, ingens putris saniei & graveolentis vis & copia ex abstrusis huius ossis recessibus & latebris prorupit. Quid? quod recondita in ejus cavo medulla pedetentim usque adeo delinquit, ut effuso pure, osseum hunc specum omni suo medullosa plane exhaustum ac vacuum nactus fuerit *p*), testimonio sole meridiano clariore ossa item, ut cunctas alias partes, incendio subinde comprehendi.

§. 51. Animus si mihi foret plura hoc loco exempla, ab ipsis ossium morbis petita, quibus dictorum veritas & certitudo magis adstrui & communi-

m) *Anatom. Libr. 1. Cap. 6.*

n) *Cap. 54. Tom. 4.*

o) *Cap. 79. Abditor.*

p) *Tract. de Morb. oss. H. C. Part. II. Cap. XVII.*

muniri possit; aut gravissimorum scriptorum testimonia coacervare, quorum tamen satis magnam vim atque copiam recensere nullius fere negotii esset, vix mihi exitus in latissimo hoc differendi campo pateret: volupe tamen si cui foret Auctorum, qui præclaris suis observatis abunde testatum fecerunt, ossa subinde incendio & abscessibus corrumpi, suffragia colligere, adeat is LANGIVM *q*), SCHENCKIVM *r*), FABRIC. HILDANVM *s*) BOERHAAVIVM *t*) IOAN. CHR. HEYNIVM *u*) inque primis PETITVM *x*): ubi largam observationum pulcerrimarum messem, quæ hoc luculenter declarant, deprehendet.

§. 52. Verum enim vero æqua animi lance ponderaturus, quæ de diversa unius ejusdemque vel cujusvis ossis constructione explicata leguntur (Cap. II), facile intelliget, inflammationem nequaquam eadem semper facie ac forma indutam, in omnibus ipsius partibus, esse incessuram, sed pro ipsius, quem in eo occupaverit, loci ingenio & diversitate, admodum quoque mutata variaque se fore ostensuram: quid? quod disjunctis quoque inter se eventibus exituram. Quod si enim corporis humores stagnent in illis vasorum rivulis, qui per compagem ossium densissimam, lamellos ipsorum inter, deducti sunt, quisque, vel me tacente, videbit, incendium inde exortum multo obscurius atque occultius esse scripturum, ob durissima ossea se-pimenta sanguineis vasculis circumdata, vixque sensu quodam, si forte ullo, prædita, quam si in cellulosa ipsorum substantia, aut interno sedem suam ceperit periosteo. Quod quum ita sit, non abs re fore autumo, si, præcunte magno BOERHAAVIO, in præsentì ostendamus, quid discriminis inter illos, qui ossibus accidere solent, morbos intercedat.

§. 53. Omnes vero, qui ossa tentare assolent, morbi, vel hærent in ipsorum periosteo defixi externo; vel in ipsa solida duraque ossea fabrica; e pluribus stratis, sibimet mutuo nexis, excitata, resident; vel sedem sibi figunt in cavernosa seu cellulosa eorum textura; vel periosteum tenent internum; vel denique in ipsa medulla stabulantur. Solet vero incendii vis plerumque, in una harum cujuscunque ossis partium si fuerit subortum, se latius in alias ipsius diffundere, ita, ut periosteo velut interno, undecunque inflammatione incenso, ex hoc, vel ad inclusam utplurimum medullam, vel ad circumvolutum ipsi corticem osseum, vel ad utraque simul transeat. Quemadmodum id quoque observatur in oculis substantiæ cellulosæ, aut in externo periosteo si morbi fomes gliscit. Prout ergo phlegmone in hac illa-

D 3

q) Epist. 42. Tom. 2.

r) Observat. de Fract. & ossib.

s) Chirurg. Cent. II. Obs. 36. 68. Cent. VI. Obs. LXXIV.

t) Aphorism. de Morb. oss. §. 512. & seqq.

u) Tentam. Chirurg. Medic. de præcip. oss. Morb.

x) Tract. cit. Cap. cit.

illave ossis ejusdem parte fuerit enata, ipsa quoque inflammationis & symptomata, & eventus a se invicem disjuncta erunt.

§. 54. Quod itaque ad illos attinet morbos, quorum incunabula in exteriori sunt periosteo, quippe qui ut plurimum ex eo in solidam quoque ossium substantiam redundant ipsique labem inferunt, non est, cur eos speciatim heic pertractemus, nisi quatenus inde vitium ossibus accessit. Videmus enim ossa plerumque vitia facere, periosteo externo inflammato, contuso, vulnerato, exulcerato, vel alia quadam via offenso. Innumera se nobis offerunt exempla, quibus hoc confirmare valeamus, nisi brevitatis ratio nobis foret habenda. Quænam vero subsit causa, quamobrem ipsa ossa nonnunquam cariem inducunt, periosteo suo externo orbata, ex dicendis clarius cernetur.

§. 55. Prius autem quam ad illos ossium morbos, qui in abditioribus ipsorum atque interioribus latebris, quinimo mediis subinde medullis, velut natali suo loco progignuntur, ingrediar excutiendos, vix teneor, quin apertius dicam, ossium morbos a plerisque rei Chirurgicæ scriptoribus, in primis antiquioribus, adeo obscure & leviter, quin perplexe in ipsorum monumentis esse traditos, ut vix quicquam aliud, præter quam ipsorum cariem attigerint. Quid? quod nec inter recentiores quidem, vel optimos quosque, qui de ossium vitiis aliquid literis mandarunt, convenit, quotena morborum genera ipsis accidere possint, aut quemadmodum a se invicem diffideant. His itaque consideratis, spero futurum esse, ut nemo mihi, ingenii mei vires experturo, vitio vertat, si in morbis eorum excutiendis, non ita rem acu tetigero, ut in votis fuit, præsertim quum tam pauci sint, qui in hac tam ardua, tamque contorta re mihi, si a BOERHAAVIO paucisque aliis discessero, præluxerunt.

§. 56. In censu igitur morborum, in densa duraque ossium compage qui pedem subinde figunt, primas ferre videtur ipsorum caries, quæ consistit in soluta ipsius ossæ substantiæ continuitate, qua hujus lamellæ paulatim ita invertuntur & destruuntur, ut in exiguas squamulas seu furfures, sensim sensimque deciduos, fatiscant, cum superficiiei ossis asperitate seu inæqualitate, si in hujus externa hæret facie, semper stipata. Non sum quidem nescius, hanc de ossium teredine definitionem non cuivis probatum iri, quum longius ab ea diffideat, quæ rei chirurgicæ deditis usitata & recepta. Est quippe ea plurimorum sententia, illa ossa, quæ cariem sentiunt, non colorem modo suum album assiduo permutare cum flavescente aut nigricante; sed ichorem quoque graviter olentem fundere: quæ quum nostra in definitione non legantur, eam pluribus forte mancā videri posse, facile crediderim. At vero quum, experientia ipsa docente, ossa carie corrupta haud raro reperiantur, his dotibus prorsus destituta, malui ab recepta definitione discedere,

dere, quam in leges definitionis rite condendæ peccare. Namque RVYSCHIVS testis est, semet ossa, quæ teredinis injurias senserunt, pluries invenisse, in quibus ne vllum quidem, vel minimum, nigroris aut alius cujusdam coloris inusitati vestigium exstitit, sed quæ nativum nitorem retinuerunt, quamvis carie ita fuerint vitiata, quasi vermibus forent exesa inque minutissimas squamulas comminuta: quamdiu enim, inquit, ossa suis integumentis exterioribus probe munita sicque ab externo aeris allapsu tuta essent defensaque; tam diu ea quoque esse ab atrore aliove peregrino colore immunia y). Eodem quoque Auctore discimus, interdum ossa teredine vitari sine ullo saniosæ uliginis stillicidio: offendit enim costas, ab insanæ molis aneurismate, in aorta nato, ipsisque accreto, usque adeo fuisse corrosas & carie consumptas, ut maximam partem defecerint z). Quod eidem observatum est in alio quodam, itidem aortæ aneurismate excruciato, quod tantæ fuit vastitatis, ut costas fere omnes cum annexo sterno, carie ipsis a solo violentiori hujus tumoris pressu affricta, depaverit a). Documento omnium oculis testatiori, ossa sæpius cariem inducere sine ulla, nec nativi coloris mutatione, nec tabi cujusdam effusione. Ex quo itaque clare etiam apparebit, illam communem teredinis definitionem in illud cariei genus duntaxat convenire, quæ ossibus ab ulcere quodam supernato, vel fistula, aut vulnere, libero aeris accessui patente, fuit illata, quippe quæ & multum saniei profundit, & ingenitum ossis colorem mutat; nequaquam vero in quamcunque cariem quadrare.

§. 57. Sunt quoque, qui teredinis vocabulum tam arctis includunt limitibus, ut nullam aliam, nisi eam ossium corruptionem, quæ a foris in horum compagem, velut a vulnere, abscessu, ulcere &c. fuit derivata, hoc nomine velint intellectam: quæ vero in ossium interioribus, ceu primis ipsius incunabulis, orta, inde usque foras proserpit, &, pereso ossis cortice, in externa hujus superficie se tum demum ostendit, spinæ ventosæ nomine insigniri cupiunt b). Quanquam vero lubens largiar, cariem spinæ ventosæ semper hædere comitem, quin certam cariei esse speciem: non tamen propter ea omnem, in ossium penetralibus enatam cariem, statim pro spina ventosa esse venditandam arbitror: sicut enim pædarthrocace in ipsis ossium interaneis, item caries quoque isthic aliquando oriri potest, quemadmodum hoc spectare licet in illa ossium corruptione, quæ natales suos ducit

y) *Observat. Anat. Observ. LXXXI. & Catalog. Rarior. Thec. B. Reposit. Ill. No. XIV. 2.*

z) *Observat. Anat. Chirurg. Observ. XXXVII.*

a) *Ibid. Observ. XXXVIII.*

b) NVCKIUS *Chirurg. Experim. XLVI.* L. HESTERVS *Chirurg. L'lr. V. Part. I. Cap. 9.*

cit ab infectione venerea, scorbuto, aut ab ipsis exostosis, vel benignis, celeberrimo Parisiensium Chirurgo PETIT recte id annotante.

§. 58. Conciliatur vero cariola ejusmodi corruptio ossium soliditati, vela causis externis, vel internis, in penitissimis eorum recessibus abdite latitantibus. Ex illarum numero sunt omnia, quæ externum periosteum premendo, contundendo, inflammando, exulcerando, peredendo, consumendo, vulnerando, aut arctissimum ipsius cum osseo sepimento, per tot innumerabiles vasorum myriades, nexum laxando, destruunt ita ac devastant, ut liquidorum expeditus inde ad ossa accessus & recessus vel retardetur, vel omnino intercludatur; ut fit a supernatis abscessibus, ulceribus, tumoribus, plagis cruentis, idque genus sexcentis aliis. In harum vero censum veniunt, quæcunque humores ejusmodi dotibus ardornant, ut in tenerrimis vasorum paginibus, foliaceæ ossium substantiæ affatim intersitis, consistant; velut qualiscunque liquidorum acrimonia atque insolens spissitudo, venerea sit, sive scorbutica vel rachitica, aut alius indolis. Quod si enim tanta est humorum spissitudo, non potest fieri, ut tam subtilissima & angustissima vascula, quæ osseas interluunt lamellas, pervadant; hinc necessario in iis subsistendo obstructionem efficiunt; id quod etiam fit acribus si redundant partibus, utpote quæ, movendo minus aptæ, si tantæ angustiae canaliculos cum sanguine intrant, qui ob circumstructos rigidos parietes osseos se dilatari non patiuntur, itidem in iis pedem figunt, sicque obstructionem faciunt, quinimo ipsa vascula lædunt; unde ossea strata cariem sentiunt.

§. 59. Lubens itaque fateor, in ossium carie, si a periosteo externo natales fuerit suos mutuata, vix aut omnino non inflammationem quandam prægressam, tanquam causam, accusari posse, sed potius culpam in humores, in minimis vasorum furculis, per ossis ambitum disseminatis, jamque a nexu cum periosteo disjunctis, restitantes, esse conferendam, utpote qui, acrimonia jam imbuti, aut eam mora & quiete isthic demum nacti, consumtis suis vasculis, ipsas ossium bracteas erodunt, hocque pacto cariem ossi inferunt. Quum enim in omni teredine, quam ossa in sua facie externa sentiunt, periosteum exterius, nisi ab ossis convexitate avulsum, semper tamen laxatum & liberatum deprehendatur, inde manifesto apparebit, sanguineos ex hac membrana in ossium compagem demissos canaliculos, ab ipsa nunc esse plane abreptos ac sejugatos; ergo sanguini, neque aditum ex hoc periosteo ad ossis densitatem, neque regressum patere ullum: hinc liquidis necessario subsistendum est in vasculis, per crustam ossis exteriorem distributis: qui tum immoti ibidem hærentes, & alienam indolem contrahentes, ossa carie vitiant. Est quidem hæc Celeberrimi PETIT sententia, Cariem æque atque exostoses inde oriri: quia in illa ossis parte, ubi periosteum ab

ossis superficie revulsum aut dimotum est; & liquorum per destructa vascula motus, & ossis nutritio, plane cessant c). At vero sola vasorum inde enata obstructio & nutritionis defectus, vix ossi corrumpendo suppetere mihi videntur, quum observationes existent, ubi ossa, velut cranii, suo periosteo magnam sane partem denudata & deglupta, nihil carioli senserunt d). Vero itaque similis videtur, non oleum modo medullare in suis meatibus subsistens, rancorem ducere, h. e., a sua blanda diathesi dejectum, acrem & rodentem naturam adipisci; sed ipsa quoque liquida, in vasculis dilaceratis consistentia, eodem ingenio indui, unde lammellarum mutuus nexus sensim solvitur, ipsæque ossæ fibræ, jam exsuccæ & fragiles redditæ, a suo mutuo amplexu ita dimoventur, ut in squamulas, furfures, quinimo subinde in pollinem paulatim fatiscant. Quod si vero ossibus vitium hoc a causa quadam interna, velut scorbuto vel venerea infectione fuerit partum, nihil quoque dubii est, quin caries ex prævia quadam qualicunque incensione subinde ortum ducere queat, liquidis scilicet humani corporis nondum adeo lentis ac spissatis.

§. 60. Si autem perpendamus ingentem illam, quæ ossibus est, duritiam & perexiguum, si quis forte ipsis fuerit, sensum; teneritatem atque exiguitatem vasculorum, quæ ossibus bracteis hærent interposita; oppido languidam horum vim se contrahendi, & perlabens liquidum protrudendi; defectum motus partium, his vasorum furculis circumjectarum, ipsisque subsidio venire nesciarum; insignem illam a conica vasorum figura objectum latici ingressuro renixum; ipsam liquorum jam appulsorum conditionem, sanguini ad intimas quasque ossium latebras provolvendo minus commodam, & ab omnibus his relatis pendentem valde retardatum atque adeo lentissimum cruoris per ossium vasa circuitum: nullo sane negotio cognoscemus, quamobrem sanguineo latici tam prompte via per exiles vasorum ramos, in ossium soliditate confitos, progrediendi obsepiatur, & quomodo, iis occlusis, incendium ossibus quaecunque interdum inde accendi possit, cuius tum effectus, præter multos alios, lenta illa ossæ compagis esse potest consumptio, cariei nomine satis nota. Intelligemus quoque indidem, cur aliqui dissertis verbis tradiderint, quod ulcera forent in partibus corporis mollioribus, idem esse in ossibus cariem e); quare etiam B. WEDELIO nomen corruptionis ulcerosæ huic malo non inepte convenire fuerit visum f), quamvis sint, qui gangrænæ nomen vel sphaceli huic vitio vindicare maluerint g). Perspicie-

E
mus

c) *Libr. cit. Cap. I. cit. p. 248.*

d) *Fabr. HILDANVS Libr. cit. Cent. IV. Obs. XCV.*

e) *SYLVIVS Tract. Ill. Prax. Medic. Append. LXXXVIII. p. 669. Petit Libr. & Cap. cit.*

f) *Dissert. de carie ossium Cap. I. §. 2. & 6.*

g) *Ibidem.*

mus quoque iis, quam ob causam incendii vis, si in ipso ossis corpore fuerit concitata, adeo occulte recteque serpat, ut vix ab ægroto sentiatur, nec æque clara inflammationis signa ibi, atque in mollioribus corporis & acriori sensu dotatis partibus, ostendat.

§. 61. Nullus itaque vereor affirmare, ossa quandoque cariem trahere a prægressa quadam, vel quantulacunque, inflammatione, sive in solida ipsorum textura, compluribus laminis, alia super aliam aggestis, composita; sive in cellulosa strue, aut alia eorum parte, undecunque succensa, potissimum si hæc a causis internis fuerit progenita: at vero haud quoque insolenter eadem infestari, ne ullo quidem ullius incendii vestigio conspicuo; liquidis videlicet in subtilibus vasorum ramusculis, a periosteo externo protentis, & toto ossis cortice sese spargentibus, iter pergere suum omnino impeditis & conquiescentibus, ob segregatum ab ossium superficie prorsusque exsolutum aut alio pacto consumptum periosteum: unde sanguini ex membranaeo hoc involucro, neque aditus eo per arteriolas interruptas patet, neque per venulas usque inde ad periosteum regressus. Rebus sic se habentibus, fieri non potest, ut, liquidis aditu atque introitu in osseum munimentum prohibitis atque interclusis, huic incendium accendatur: quemadmodum hoc liquidius apparet iis, quæ de inflammatione Cap. I. relata leguntur. Data ergo opera hæc mihi de ossium teredine præstruenda esse existimavi, ne quis eam in opinionem adducatur, quamcunque ossium cariem uni me acceptam esse relaturum inflammationi præviæ: quum non ignorem, plures easque varias unius ejusdemque effectus esse sæpius causæ posse; non ergo dubitari potest, quin vel cariosa hæc ossium consumptio, itidem a disjunctissimis interdum causis suboriri queat. Quocirca de hoc extiabili ossium malo eatenus heic sermonem expono, quatenus illud ipsis a præcedente quadam incensione nascitur, nequaquam vero de qualibet iisdem illata teredine, utpote ad nos non pertinente.

§. 62. Iam proinde ad ipsam ossium inflammationem, utpote genitricem multorum, quæ ossibus crebro evenire solent, malorum foecundissimam, ingrediar breviter explicandam. Quæ, si in vasis sanguineis, intra osseas ipsius duri densique corticis lamellas decurrentibus, fuerit concepta ac suscitata, eo difficilius adesse cognoscitur, quo magis latebrose a conspectu se occultat nostro, nec ullo alio prodit signo, nisi formicante illo & perquam obtuso doloris sensu, in ipsa ossium substantia hærente, quem æque obscurus hebesque ardor utplurimum comitatur, qui attactu externo neque exasperatur & crudescit, neque mitescit aut omnino filet, sed antiquum semper obtinet. Hoc tamen haud sane indignum observatu videtur, eum, venera potissimum lue scorbutove si fuerit, veluti sua radice, pronatus, noctu utplurimum, ægrotis cubitum euntibus, lecti calore ingravescere: quamprimū

num vero cubitu resurrexerint atque alserint, quodammodo remittere. Accedit plerumque febris, e pulsus velocitate judicanda, quæ modo vehementior, modo remissior, interdum usque adeo moderata existit, ut non nisi perattento observatori pulsus duntaxat exploratione innotescat, utpote quem æquocitationem percipiet. Hæc itaque potiora incendii signa sunt, unde, adjunctis iis, quæ hoc malum vel præcesserint, vel comitata fuerint, colligere licet, ubi locorum illud in ossibus delitescat.

§. 63. Quod si vero phlegmone periosteum interius seu tenerrimam medullæ circumtextam corripuerit membranam, utpote quæ sensu est acerrimum, tum ea hanc occupasse intelligitur cruciatibus illis acerbissimis, quos, hoc morbo afflicti, in ossium abditis & quasi visceribus sibi sentiri verbis subinde exprimunt cum magno ardoris sensu conjunctos, RVYSCHIO id optime omnium observante *b)*: quibus febris comes hæret individua. Ejusdem quoque census est, quæ loculos cellulosæ substantiæ, præsertim in sic dictis ossibus fistulosis, comprehenderit inflammatio, quippe qui itidem membranula, similis & teneritatis, & sensus, intus sunt convestiti; ut insignis ille cavus, cui medulla spissior hæret inclusa; ubi ergo hujus inflammationis symptomata eandem præ se ferunt faciem, quam in medullæ membrana obvolvente ostentant; unde iisdem quoque signis, paulo ante commemoratis, perspicitur. Quo igitur hæ inflammationes, in fistulosis cumprimis ossibus, loci ingenio, quem obsident, a se invicem duntaxat distantes, facilius dignoscantur, omnium præcipue eas exploraturo & perspecturo structuræ horum ossium ratio habenda est: quæ enim alte defixa hæret in membrana, magnum ossis specum succingente, tristi se prodit dolore atque ardore in media ossium fistulorum parte seu corpore residente: abstrusiores vero substantiæ cellulosæ recessus quæ tenet occupatos, in ipsorum extremitatibus, ubi cancellata seu cellulosa hæc deprehenditur fabrica, sævitiam dolorum exercet.

§. 64. Nec incendii quidem vim ipsi medullæ, in vasto ossium fistulorum antro intus latitanti, parcere, perattenta, proh dolor! observatio cumulate facit testatum. Laudatissimus quippe PETIT, ipsam medullam abscessu usque eo fuisse colliquefactam, reperit, ut in putrem ac foetidam mutata fuerit colluviem, quæ, osse trepano perforato & aperto, inde effluxit, cavo ipsius casso seu vacuo remanente *i)*, testimonio manifestissimo, medullam non minus habilem esse atque aptam ad incendium concipiendum, quam cunctas alias corporis partes. Hoc qui forte dubitet, illi relinquam expendendum, quemadmodum fieri posset, ut abscessus oriatur sine prævia inflammatione. Quum vero iis, quæ Cap. I. exposita sunt, luculenter constet, inflammationes quascunque, quæ cuivis in humana machina parti usu

b) *Thesour. Anat. X. No: CLXXXII.*

i) *Libr. & Cap. cit. p. m. 342, & 343.*

quandoque veniunt, non nisi in exilibus vasorum ramulis contingere: præterea quoque ostensum Cap. II. medullosos folliculos capillaribus affluere vasculis, quæ cum sanguine medullare oleum eodem deferunt & secernunt: quisque citra pulveris jactum videbit, hanc medullæ incensionem neutiquam esse illi oleoso pingui asserendum, quod membranaceos ipsius loculos implet; sed vasculis minimis, quibus medullosi hi folliculi uberrime adornantur, solis vindicandum. Dum enim vascula hæc incendii vehementia destruantur, necesse est, ut medullare liquamen suis in cellulis consistat, quod hoc pacto quiete & loci calore sensim corruptum fracescit, cumque suis receptaculis, similiter incendio deletis & liquefactis, in foetentem abit amurcam.

§. 65. Quemadmodum vero ossium inflammationes, pro loci, quem devastant, ingenio, inter se differunt, ita ut mitioribus ac lenioribus symptomatis stipatæ incedant in ipsa solida eorum compage, quam in substantia ipsorum cellulosa, aut medullæ involucro, ubi dolores pariunt multo efferationes: sic diversos quoque habent subinde exitus, ita, ut in solidis ossium parietibus solenniter in cariem abeant; in periosteo autem interno & cavernosa ossium textura nonnunquam, licet rarissime, se discuti sinant, crebrius autem in abscessus desinant, quinimo in spinam ventosam, aut alia graviora mala, crassis hucusque ignorantia tenebris occultata, & recentissimorum quorundam impensiori studio paucis abhinc demum annis observata inque lucem prolata, evadant. Multo quippe usû se comperisse, inquit celebratissimus PETIT, in magno illo ossium fistulosorum, velut femoris, humeri, tibiæ &c. cavo, in quo medulla latet recondita, haud raro vera concremента carnea progigni *k*); quinimo tumores cancriferos excrecere *l*); quid? quod ipsam duram solidamque ossium substantiam, aliquando ita a suo ingenio degenerare, ut carnosum indueret habitum: quæ ossium in carnosam substantiam mutatio, ipsi ossium carnificatio vocatur *m*). Quæ quum ita sint, luculentissime inde cuivis elucebit, in ossium inflammationibus & dijudicandis, & sanandis, Medenti semper, (si ab ipsa remotiore causa, in corruptis massæ sanguineæ humoribus hærente, discessero, qua nihil nobis esse prius debet nihilque antiquius) ad locum in ossibus, inflammatione obsecsum, maxime esse respiciendum, quo recte intellecto, non adeo erit arduum, cæteris eam affectari solitis symptomatibus, in consilium simul adhibitis, de earum præsentia rationali conjectura augurari.

§. 66. Causæ vero, quæ huic incensionem, in ossium tam dura multisque stratis condensata compage, quam interioribus atque abditiore latebris susci-

k) *Libr. & Cap. allegat. p. m. 268, & seqq.*

l) *loc. cit. p. 279.*

m) *Ibidem p. 283, & seqq.*

suscitandæ viam pandunt, externæ juxta atque internæ esse possunt. In numero illarum sunt, præter alias, periosteï externi inflammatio, non satis mature discussa, ut quæ tum latius se fundens, substrato ossis cortici simile vitium affert: quam diu enim hoc velamentum cum ambitu ossis exteriori, per tot vasculorum stupendæ exiguitatis myriades connexum est, nec dum utcumque ab eo exsolutum aut sublatum; tam diu quoque patet liquidis introitus ad substructi ossis soliditatem. In hoc ergo casu nihil impedit, quo minus sanguis ex hoc involucro in ossium substantiam influat, hujusque bractæas alluat. Quod si itaque periosteum hoc inflammatione fuerit incensum, non dubium est, quin purpureus latex, velociori motu per patulos ejus tubulos jam actus, itidem citatior quoque latus fuerit ad ossis inclusi substantiam, ubi quidem initio celerius per exiguas vasorum propagines, osseis laminis affatim intersitas, decurrit, (nisi forte uberiore copia, quam pro capacitate horum vasculorum, eo irruat) unde sanguinis globuli pernicious inter semet invicem agitati & collisi inflammantur, licque incendium ossi accendunt; at periosteï inflammatione eo usque increbescente, nec in tempore convenientibus auxiliis repressa, ut vascula hæc, in ossis cortice disseminata, nimia humorum vi & mole obruantur, non aliter fieri potest, atque ut liquida, ipsis a periosteio uberius iusto infusa, ob loci ingenium, vasculis nimium repletis & distentis, neque cedens, neque auxilio in contentis liquidis propellendis veniens, in illis consistant, hocque modo acrimoniam contrahant, unde ossea strata cariem recipiunt.

§. 67. Præter hanc commemoratam inflammationis causam, eidem malo, ossium interiora quæque invadendo atque occupando, viam quoque aperiunt, quæcunque promptum liquidorum per vascula ossium minima progressum interturbant, velut graves partium corporis percussiones & concussus, undecunque oriunda, sive plagis & verberibus, corpori illatis; sive violentis ictibus, aut casu quodam ab alto idque genus pluribus, quippe quæ omnia non medullam modo in ossibus reconditam vehementer concutiunt, sicque sanguini in huius canalibus resistendo occasionem offerunt; sed ipsis quoque vasculis, per interiores quosque ossium recessus & cavernulas distributis, injuriam subinde faciunt. Ne igitur longius abeam, unam duntaxat observationem, ab laudatissimo PETIT mutuata, quæ nobis instar omnium sit, huc adferre liceat, quippe qua dictorum veritatem satis superque adstruxero. Vir quidam, ex equo cadens, exiguum inde cutaneum duntaxat excepit vulnusculum in crure, a quo ipsi haud ita multo post exostosis quædam, in epiphyysi ossis tibiæ superiore, fuit suborta, qui aliorum auxiliis & consiliis per longum tempus, non tamen ullo levamine, usus, Celeberrimi PETIT opem imploravit. Hic, vulnusculo hoc curatius explorato, latitantem profundius sub eo deprehendit abscessum, ad ossis usque crustam de-

scendentem, quo pertuso & eo usque aperto, ut ipsi aditus ad ossis tibiæ externum ambitum patuerit, eum contegente suo periosteo degluptum nactus est: vulnere autem satis amplificato, fragmentum quoddam, ab osse separatum & aliquantulum intro depressum, oculis usurpavit suis, quo instrumenti ope rursus elevato, actutum purulenta graviterque olens prodiit ex osse materia: verum enim vero, quod omnium maxime mirum, erat hoc, quod, extracta illa atque amota ossea festuca, ipsaque inde relicta in hujus ossis pariete apertura usque eo patefacta, ut digitum vasto hujus ossis cavo, qui medullam complexu suo coërcet & continet, inserere valuerit, carnosam quandam insignis profecto molis massam, in ipso illo ossis antro delitescentem atque inclusam, quæ ex solido ossis pariete pullulaverat, invenit, quæ in parva frustra concisa, & usque inde frustillatim exemta, inque unum congesta, pugni magnitudinem æquavit. Hunc carnosum tumorem non minus, quam illam purulentam amurcam, a nulla alia fuisse progenitam causa, ac sola ea violentiori ossis concussione, quam sustinuit, viro hoc ex e quo prolabente, PETITO perquam probabile videtur *n*). Reliqua, quæ in hanc rem dici possent, ex industria silentio premam, ne longior sim, quam instituti ratio permittit.

§. 68. In causarum numero internarum sunt referenda, quæcunque humoribus acrimoniam & insignem induere valent spissitatem, ita ut in minimis vasorum tubulis facile pedem figant, & hac via ossibus incendium excitent: ut lues venerea, scorbutus, rachitis & quævis alia liquorum corporis humani lentitia, undecunque nata. Quum enim vasculorum, quæ per ossium fabricam feruntur copiosissima, tanta sit teneritas & angustia, ut non nisi liquida, satis tenuia & fluxa, secundum naturam admittant, nemo non facile intelliget; sanguini de sua ingenua agilitate ita deturbato & congelato; aut acribus & arrodentibus salinis partibus foeto, non satis expeditum iter per tam angustos ossium tubulos esse futurum, qui hac ratione in iis, præsertim intra rigida ossium strata deductis, inhærescit; aut, si minus quidem lentus & viscidus, veruntamen ingenti salium varii generis ubertate fuerit confertissimus, eadem permeando dilacerat & discindit; unde liquidis disturbatos hos & dirutos vasorum canales percurrere præpeditis, ad alios pervios divertendum est ramulos: hinc oritur inflammatio. Pandit se hic mihi campus de his pervicacis ingeni malis, quæ ægrotis sæpius sunt exitium, dicendi latissimus, animum si induxissem longius evagari atque ostendere, quo pacto delibatissima sanguinis lymphæ, venereis sordibus inquinata, indeque immodice spissata & corrupta, tot tantisque dissidentibus ossium malis conflandis, velut ipsorum cariei, inflammationi, abscessibus, exostosis, aliisque, viam sterneret; aut quemadmodum scorbutica humo-
rum

rum mordacitas iisdem vitiis causa subinde existeret: at vero tum non disertatio, sed liber haud parvæ magnitudinis, mihi foret excudendus, cuncta latius persecuturo. Sufficiat ergo hic tantum indicasse, Medico, veram harum in ossibus inflammationum causam sciscitatur, eos morbos esse maxime respiciendos, qui hanc ossium incensionem, vel quondam præiverunt, vel etiamnum comitantur; iis quippe exploratis & compertis, haud quamquam erit difficile certius cognoscere, ex quo fonte hæc mala fluxerint, & quis effectus ea sit consecuturus.

§. 69. Operæ ergo pretium erit hoc loco illos exitus, quos hæc ossium incensiones nonnunquam habent, leviter tantummodo perstringere; de inflammatione quippe, quomodo in quavis fere ossis cuiusdam parte seorsum contingat, hic nihil attinet dicere: quia in ossium interioribus vix alio modo peragitur, atque in omnibus aliis partibus, præterquam quod magis abstrusa atque abdita latens, a conspectu nostro occultetur. Qui ergo ea, quæ in universum de inflammatione explicata Cap. 1. exstant, spectata habuerit & cognita, ex iis nullo intelliget negotio, quemadmodum in ossium latebris, vel abstrusissimis, ea efficiatur; ut proinde non attineat usque a capite huc arcessere, quæ jam isthic satis dilucide & perspicue expedita leguntur. Quod si itaque consideremus, qualis exitus incensionem maneat, in ossium duritia & soliditate subortam, nullus dubito aperte fateri, insolenter eam ac per raro, si forte unquam, resolvi & discuti; sed ut plurimum in cariem desinere, aut in exostoses aliquando abire. Hujus non ulla esse alia videtur ratio, quam quod vascula sanguinea, ossibus rigidis sepimentis usquequaque circummoenita, non habeant, quorsum cedere seque movere possunt: unde desideratis iis, ad staseos resolutionem perquam necessariis conditionibus, §. 19. no. præsertim 2. commemoratis, frustra heic resolutionis effectus a natura expectatur: at vero nec is quidem ab ipsa arte sperandus videtur, 1) quia incendi loci, circumsepto osseo munimento, medicamentis, vel efficacissimis, externe admotis, plane invius atque obseptus est; 2) quia neque canalibus ibidem confitis aliquanto auctior systole & diastole; neque, si usus fuerit, moderata laxitas; neque ipsis eodem loco subsistentibus liquidis per remedia discutientia, tam alcalina fixa, quam volatilia, aut saponacea, diluentia, idque genus alia, fluiditas conciliari queunt. Omnis enim, quæ artis beneficio perficitur, resolutio humorum, in suis vasculis conquiescentium & concretorum, non ulla alia, nisi triplici hac via absolvi potest, id quod pluribus demonstrare nullius esset negotii, nisi rem hoc loco, quam brevissime possim, expedire constituissim; 3) quia etiam sæpissime ipsorum, tam in ossium vasculis consistentium, quam in canalibus motorum liquidorum, ea est indoles, quæ artificis resolvendi conamina illudit, præcipue si venerea aut scorbutica est (vid. §. cit. N. 1. & 3.) Non obscure ergo his perspicietur, quid

quid causæ sit, quamobrem inflammatio, si in præduro osium sepimento hæret defixa, plerumque in cariem transeat, minus vero sæpe se dissolvi sinat.

§. 70. Qua autem via incendium in cariosam osium corruptelam contendat, id perspicuum erit iis, quæ de osium carie, inflammationi ipsorum §. 56. & seqq. præmissa habentur; ubi ostensum est, stagnantes in vasis liquores, alienum sensim induere ingenium, osseæ texturæ infestissimum. An vero acrimonia hæc accidæ sit prolapiæ, ut SYLVIO o), an alcalinæ, ut HEY- NIO p) fuerit visum, an alterius naturæ, hic determinare supersedeo aliis- que perspicacioribus dijudicandum relinquo. Quum itaque adducto loco meam de osium teredine mentem fusius exposuerim, hinc non est, quod ei latius persequendæ immorer. Quæ ergo nobis jam venit contemplan- da, est sic dicta exostosis, quæ est tumor inæqualis & salebrosus, exteriori os- sium superficie se exserens, & ab ipsorum substantia non multum abludens, modo prominentior & major, modo minor & depressior, qui cum dolori- bus interdum satis vehementibus est consociatus, aliquando autem adeo ob- tusus, ut vix ab ægrotante percipiantur. Solet quoque hic affectus pluribus aliis efferri nominibus a quibusdam Scriptoribus, velut nodi, nodositatis, tophi, tuberositatis &c. q); quamvis sint, qui his denominationibus diversis, diversa quoque osium vitia volunt esse complexa r). Celeberrimo PETIT tam late patet hujus vocabuli significatus, ut non quamcunque modo ossi- um intumescientiam, sed ipsam quoque spinam ventosam eo comprehendat s).

§. 71. Neque consentiunt Auctores de causa hujus osium morbi. SYL- VIVS eam in materiam quandam pituitosam, at tenacem & viscidam, ab aci- do coagulata, conjecit t): RVYSCHII vero ea est sententia, hosce osseos na- sci tumores iis ex foraminulis osium, quibus tendinosæ musculorum aut li- gamentorum fibræ radicibus defixæ inhærent altissimis, quum hæ scilicet quomodocunque inde violenter forent evulsæ u). GAGLIARDVS autem ipso- rum causam suo ossescenti succo attribuit x). Verum enim vero quum mea nihil intersit, cuicunque etiam causæ Medici hoc malum asseruerint, nihil quoque attinet ipsorum sententiam huc ad incudis examen revocare, atque fusius ostendere, veri quid falsive cuique insit: ut itaque compendii faciam, nullus

o) *Tract. Ill. Prax. Medic. Append. §. XC.*

p) *Tentam. cit. Thes. XXVII.*

q) SYLVIVS *Tract. cit. §. XCIV. & XCVII. p. II. §. 70.* BONETVS *Polyalb. Tom. III. Libr. V. Cap. XXXIV. IX.*

r) BOERHAAVIVS *Aphorism. §. 549.*

s) *Libr. & Cap. cit.*

t) *Loc. jam cit.*

u) *Catalog. Rarior. Repos. V. No. I. & II.*

x) *Libr. cit. Part. I. Cap. II. Obs. VI.*

nullus dubito affirmare, exostoses a lymphâ viscida, e suis canalibus undecunque perruptis vel peresis excussa, sensimque in exteriori ossis ambitu collecta, conglaciata atque indurata, progigni.

§. 72. Nec hoc fidei absonum iis videbitur, qui non nesciunt, quo pacto ossibus diffractis callus, quo partes eorum a suo mutuo amplexu diulsæ, sibi invicem agglutinantur, renascatur: ubi alibilis lymphâ, cordis & articularum motu, ad disruptos & diremtos vasorum tubulos in osse fracto adacta, ex hiantibus ipsorum osculis in quantumcunque illud spatium, binis illis a sua cohærentia dimoti ossis frustis interjectum, paulatim effluit, quæ ibi subsistens, & pedetentim plusplusque congesta, tandem in massam quandam solidam, ossium duritiæ quam proxime accedentem, indurescit y). Ecquis est, qui adeo hospes rei Chirurgicæ, adeo ignarus, ut ignoret, quam frequentes haud insolenter hi ossium tumores societatem cœant cum ipso ossibus renato callo? RVYSCHIVS hoc, egregiis fane observatis, abunde testatum fecit z); cui quoque PETIT assentitur a), neque his abludunt alii, quos brevitatâ causa, cujus mihi ratio habenda est, hic omittam. Quod si itaque tenerrima sanguinea vascula, per ossium superficiem disseminata, a liquidis coercitis fuerint perrupta, aut perrosa & aperta, tum inde lymphâ pedetentim exterminatur, quæ exteriori ossium faciei adhærescens & pauxillatim indurescens, solidi naturam induit, sicque eiusmodi excrescentias parit. Nec dissentit a me HAVERVS, hos ossium nodos pariter a succo ossa nutriente, e suis receptaculis ejecto, atque in ossium superficie sensim solidato, arcessens b). Accedit eodem quoque PETIT, ut qui similiter hujus mali fontem in lymphâ tenaci, vasorum alveis effusa, sensim plus congesta, conglaciata inque ossium cortice foris adnata, quæsiuit c).

§. 73. Noli vero putare, excrescentias hasce prægressæ cuidam ossium incensionî a me uni solique acceptas referri: sunt quippe plures, præter eam, aliæ adhuc causæ, quæ his exostosis generandis velificantur. Huic rei testimonio esse possunt conquistissimæ illæ a PETITO literis commendatæ de his morbis observationes, ubi ejusmodi exostoses ortum inde duxerunt suum; quod periosteum exterius a subjecta ossium crusta fuit vi externa laxatum, aut omnino distractum: hinc quoque ipsi venit in suspicionem, numne ejusdem generis mala, periosteo interiori utcunque læso, aut a circumjecto osseo munimento liberato & retracto, sicut in exteriori ossium ambitu, item in fa-

F

cie

y) IOANN. MVYS. *Libr. supra cit. Dec. 1. Obs. IX.*

z) *Loc. jam cit. No. I. II. III. & IV.*

a) *Libr. & Cap. cit. p. 263.*

b) *Libr. cit. Serm. II. Cap. IV. p. 176. & seq.*

c) *Libr. & Cap. cit. p. 249. 251. 256. & seqq.*

cie ipsorum interiore, atque adeo cellulosa compage, existere possent? *d)* nec ego exputare possum, quin hoc concessuri simus, quum RVYSCHIVS duo diversa ossis tibiæ exhibeat segmenta, secundum longitudinem singulari studio diffissa, in quorum externa facie tophus haud mediocris magnitudinis satis est conspicuus; in interiori autem superficie exostosis cavernosa visui objicitur conspicienda *e)*.

§. 74. Explorata autem est veritatis, non esse ullum humano in corpore osseum fulmentum, vel minimum, quin his vitiis foret obnoxium, PETITO id optime annotante: nec ossicula quidem illa perexigua, in auditus organo latitantia, ab his malis esse immunia, Excellentissimus CASSEBOHMIVS in ossiculo incudis præclare ostendit *f)*, condita quippe servat plura hujusmodi ossicula, præsertim incudes, in quarum cruribus exiguas exostoses mihi, (quæ singularis ejus est in me benevolentia) haud ita pridem dedit conspiciendas. Neque eadem omnium exostosis esse facies & in ossibus sedes observatur: quædam enim sunt exstantiores & ampliores, aliæ vero depressiores & angustioribus terminatæ limitibus: nonnullæ pariunt ossibus, quibus agglutinatæ hærent, duriores, quam in sanitate alias fruuntur, soliditatem; aliquæ e contrario exuunt ossibus nativam densitatem, unde haud raro usque eo remolefcunt atque immodice extumescunt, ut nullius ingenii ferre vi integrum sit, vel conjectura, assequi, unde ossibus tam admiranda eveniat metamorphosis. Luctuosa, cheu! experientia uberrimam ejusmodi observationum copiam suppeditat, ubi illa tantopere emollita fuerunt atque extuberata, ut ceræ mollis in modum flecti se ac torqueri passa sint: alia ex adverso tam fragilia tamque friabilia sunt reddita, ut levissima quaque occasione, vel sola corporis tantum commotione, tam inter ambulandum, quam recumbendum, fuerint diffracta *g)*. Enim vero non erubescio aperte atque ingeuue confiteri, per sane difficile esse, veram tantæ mutationis ossium rationem reddere; multo autem difficilius, eam ad sanitatem reducere, præcipue si altas in ossibus egerit radices.

§. 75. Quod si tamen nobis dicendum, quænam sint hujus calamitosi mali semina, non veremur fateri, ea in singulari quadam humorum corporis nostri corrodente & perquam mordaci acrimonia esse sita, qua ossium textura sensim adeo exeditur & consumitur, aut simul remollitur, ut, vel mutuus pacticularum in fibris osseis nexus omnino pereat; vel adeo laxus & dif-

d) Cap. jam cit. p. 260.

e) Thessaur. Anat. X. No. CLXXVII. & CLXXVIII. Tab. II. Fig. IV. V. IX. X.

f) Tract. Anat. de Aure human. Tract. IV. §. 146.

g) FABR. HILDANVS. Cent. II. Obs. LXVI. Obs. LXVIII. & Cent. VI. Obs. LXXIV. IOH. SCHENCKIVS Observat. Libr. V. Obs. 7. DOMINIC. GAGLIARDVS Libr. cit. Part. I. Cap. II. Observ. III. RVYSCHIVS Catal. Rarior. Thec. I. Rep. V. No. V.

& dissolubilis evadat, ut quoquo versus subinde incurvari se atque obliquari sinant. An vero hæc liquidorum mordacitas alcalina sit, an acida, ut plerisque videtur, hoc loco decidere non sustineo, quanquam plurima, & argumenta, & experimenta, contra alcalinum ab acido stant: indubiis quippe experimentis compertum est, ossa ab affuso quodam acido, cum primis validiori, velut salis, nitri aut vitrioli &c. usque adeo macerescere ac dissolvi, ut in pulvem abeant: RVYSCHIVS quoque in suis conditis Anatomicis asservat infantis cujusdam costas, acido liquore maceratas, quæ tam flexuosæ inde factæ sunt, ut nullo negotio curvari, & ad similitudinem literæ majusculæ P. configurari potuerint. *b)*. Si porro cogitemus, ex hujusmodi ossium corruptionibus ut plurimum laborare homines, qui Gallicum morbum, scorbutum, aut aliud, id genus, vitium alunt, non improbabili forte ratione Auctores inde concluderunt, ossa tam turpiter deformari, & de sua ingenita soliditate dejici, acido quodam humorum magmate *i)*.

§. 76. Operæ pretium mihi fuit visum paululum excedere ad enarrandum, quam gravia ossibus interdum nascantur damna ab ejusmodi excrescentiis: ut igitur in viam, a qua declinavi, revertar, non silentio mihi transeundum existimo, exostoses a solertissimo PETIT in benigniores partiri & deteriores vel, si magis tibi arriserit, maligniores. Hujus generis sunt ipsi omnes, quæ natales ducunt suos, a depravata, corrupta & multis impuritatibus redundante fluidorum massa, velut a venerea contagione, scorbuto, rachitide, aliisque vitiis, quorum semina in sanguine dispersa hærent, quæque magno dolorum atq; aliorum symptomatum choro sunt stipatæ: de illarum vero grege sunt, quæ a sola periostei quadam labe, sanguine ipso incontaminato atque innoxio, proveniunt, neque cum ullo propemodum dolore, aliove tristi accidente, sociatæ exsurgunt, præterquam quod ossibus, in quibus adnatæ sunt, in loco affecto, plus soliditatis & duritiæ concilient *k)*. Affert quoque varia exempla de quibusdam hominibus, qui ejusmodi melioris notæ exostoses, per multos annos, aluerunt sine ullo fere incommodo & sanitatis dispendio; quæ scalpro Chirurgico & tudite minutatim defectæ & ablatae, non ipsæ solum nitidissimi eboris, & duritiam, & candorem, retulerunt; verum ipsius quoque subjecti ossis substantiam similibus adornarunt dotibus.

§. 77. Præter jam excussos ossium morbos, qui prægressam aliquando incensionem consequuntur; alius quidam isque fere inauditus ac perquam insolens inflammationis exitus huc venit considerandus, quem, præter laudatissimum PETIT, vix quisquam animadvertit & literis dedit consignatum. Multo enim

F 2

b) Thes. Anat. Maxim. No. CLXIV. & Curis Renovat. No. CXXIX.

i) SYLVIVS Loc. cit. IOAN. MVYS. Libr. cit. Dec. I. Obs. VIII. & Dec. III. Obs. II. W. WEDELIVS Dissert. cit. Cap. III. §. 4. GAGLIARDVS loc. cit.

k) Libr. & cap. cit. p. 261. & 301.

enim usu expertus est, tumores carnosos in amplo illo ossium, in primis fistulorum, cavo, medullæ custodiendæ dicato, ex ipsis solidis ossium parietibus intus interdum progerminare, qui modo benigniores, modo maligniores, quinimo subinde cancrofi sunt: quemadmodum hoc videre est rarissima illa observatione, quam §. 67. ex hoc Auctore dedi descriptam, ubi excrementa carnosæ in ossis tibiæ antro, in quo medulla latitat conclusa, ex interiore ossis facie extuberavit, quæ bonæ indolis videtur fuisse: quod sola exsectione feliciter fuit sanata. Longe vero pejoris notæ fuit alius fungosus & cancrofus tumor, qui, amputato crure, in ipso magno ossis relictæ & detruncati cavo excrevit: hic enim, qui admodum durus & lividi coloris, brevi adeo increbuit, ut foemina hoc malo afflicta inde mortem obierit 1). Neque his multum abludere videtur ille rarissimus casus, cujus FABR. HILDANVS mentionem facit, ubi foeminæ cuidam crus fuit præcisum, ob insanabile ulcus, e cujus restantis & mutilati ossis tibiæ specu, medullam complectente, ab obtruncatione, de integro fungosa quædam caro pullulavit, quod plurimum negotii Chirurgis faceffivit m).

§. 78. Quod vero maximopere mirandum videtur, est, quod Celebratissimus PETIT persæpe attonitus quasi observaverit, ipsam ossium solidam ac præduram compagem a sua ossea natura descisse, inque mollissimam & carnosam degenerasse substantiam, quæ, sicut aliæ molles & cornosæ corporis partes, item cultri acie dividi se ac minutatim consecare passa est. Documento hujus mirabilis rei complura affert exempla, ex sua ipsius experientia deprompta, ubi densa ossium textura usque adeo fuit commutata, deque sua nativa soliditate deturbata, ut admodum nihil a carnis ingenio abluferit; valuit quippe ea similiter ferri acumine conscindere, atque alias molliores corporis partes. Quæ omnia huc adducturus, dissertationis modum facile excederem: adeat ergo, qui perlegendi has observationes desiderio captus, allegatum Scriptorem, quo non facile ullus ossium morbos hucusque dilucidius magisque perspicue pertractavit n).

§. 79. Qua autem via ossibus tanta afferatur deformitas, tantaque mutatio, nondum inter Auctores constat, neque ipsi laudatissimo PETIT liquuisse videtur, nihil aliud perhibenti, quam, non adeo fore arduum hujus metamorphoseos rationem invenire, dummodo aliquis ossium progenerationem spectatam haberet & cognitam. At vero quum hæc nondum satis perspecta, sed spissis adhuc circumfusa tenebris lateat, vix ulla inde spes hujus ossium in carnosam massam mutationis declarandæ videtur affulgere: via igitur magis compendiaria ad illum modum, quo carnosi ejusmodi tumores in ossium

cavis

1) Loc. cit. p. 279.

m) Libr. cit. Cent. II. Observ. XXXVI.

n) Libr. & Cap. alleg. p. 279. 283. 291. & seqq.

cavis suboriri possunt, cognoscendum nobis duci posse videmur, sensus si ad ea percipienda intendamus, quæ in aliis aliarum partium excrescentiis, præternaturam identidem luxuriantibus, visui subinde obvia: iis quippe pernotis, neque ipso modo, quo affectis partibus inolescunt, ignorato, minus difficile erit, satis probabili analogia, inde colligere, quo pacto ejusmodi tumores carnulenti in ossium abditis & penetralibus extuberare; quid? quod ipsa solida horum fabrica in facile dividuam & sectilem degenerare massam possint. Plurima sane atque obvia sunt exempla, quæ nobis usui esse & argumento possent, ea huc allaturis; sed, ne longius abeamus, ex tanto eorum penu solius polypi narium generationem præsentī explicatione, quoad ejus fieri potest, illustrare conabimur: quia, hujus genesi intellecta, nullius fere negotii erit cognoscere, qua via similes prope extuberationes in ossium interioribus se exserere queant.

§. 80. Est vero narium polypus tumor ut plurimum carnosus, modo rubens & mollis, modo albicans, interdum vero lividi aut nigricantis coloris perque durus, ideoque tum ad canceri naturam accedens proximus, qui ossibus plerumque spongiosis superioribus, aut ipsi cribroso ossi hæret suis radicibus affixus, unde multis persæpe ramis protentus, per nasi compluvium, ad intimos quosque hujus recessus spargitur. Hujus egerminandi modum sedato animo qui fuerit contemplatus, clarissime perspiciet, eum a nulla alia oriri causa, quam a vasculis sanguineis, per pituitariam membranam abundantissime disseminatis, undecunque, vel diruptis, vel acri quodam & corrode peresis & laceratis, quæ tum nutrientem qualemcunque succum ex aperturis suis pedetentim exstillant, cujus partes minimæ deinceps inter se mutuo sensim, nunc laxius nunc arctius, cohærescentes, lentescentes, tandemque solidatæ, fungosam illam excrescentiam, polypi nomine insignitam, pariunt: quemadmodum hoc longe elegantius doctiusque dedit explicatum Vir magna doctrina & virtutum splendore ornatissimus, Excellentissimus BASSIVS, Præceptor ac Patronus, æternum mihi colendus atque observandus o). Dedita opera hic omitto, quæ de modo, quo luxurians in vulneribus caro, sarcomata aliaque id genus compluria subinde succrescere solent, in medium proferre possem, ut quæ cuncta ejusmodi in ossium cavo prognatis tumoribus, quini- mo ipsi ossium in mollem & carnosam habitudinem mutationi rectius capiendæ lumen accendunt, ne sim longior, quam mihi propositum est.

§. 81. Quod si ea, quæ jam de narium polypo ejusque excrescendi modo e commemoravi, consideratius expendamus, exputare non possum, quid obstet, quo minus eadem ossibus aliquando item evenire contendamus, vasis sanguineis quum pariter, atque omnes aliæ corporis partes, affluant; quæ, vel a prævia qualicunque inflammatione læsa & diffusa, vel a sola humorum

mordacitate peresa & aperta, liquores suos contentos continenter exsudabunt, quorum ergo minima corpuscula, ex patulis atque hiantibus vasorum surculis elapsa, eodem modo, ac de polypi narium progeneratione expositum est, ad se invicem deinceps adnexa, sensim agglutinantur densius adstrictiusque aut remissius & rarius, prout ipsa liquida effusa inter se differunt: id quod quum infinito vasorum numero simul similiterque accidat, quisque nullo perspiciet negotio, quemadmodum omnia hæc excreta & producta vascula, in unum gregem congesta & inter se conjuncta, ejusmodi carnosos confingere & conformare valeant in ipso ossium cavo tumores, qui, sicut narium polypi, item vel bene interdum, vel male morati, quinimo subinde livescentis aut nigricantis coloris & impense duri existunt, sicque cancrum æmulantur. Neque arduum erit jam explicata sedulo secum agitati inde causam eruere, quomobrem dura solidaque ossium substantia, compluribus laminis, alia supra aliam stratis, densata, in massam quandam carnosam facileque secabilem non nunquam transformetur. Quod si enim acria & corrodentia liquida, ex erosis laceratisque vasorum surculis intra fibrosas ossium lamellas effusa, ibidem subsistunt, quiete & loci calore ipsis acrimonia adeo exaugetur, ut ossicas fibras arrodant, sensimque minimas earum moleculas a suo mutuo amplexu & cohærentia divellant & distrahant, hocque pacto evertant. Quum vero liquidorum in vasis suis vi vitæ motorum acrimonia haud quaquam sit tanta, quanta liquoribus, intra lamellas ossium consistentibus, ob dictas jam rationes, accessit; hinc utique fieri potest, ut lymphaticus latex, ex vasorum alveis excussus, eodem modo, ut de polypo & interioribus ossium excrescentiis traditum est, concreascit & perruptis suis vasculis adhærescat, eademque hac via sensim producat; quæ tum in unam struem congesta, ejusmodi deformatam mollemque referunt substantiam carnosam. Fateor mihi brevius hic dicendum esse, quam tanta tamque mirabilis res dici & posset & deberet; verum temporis ratio me prohibet, quo minus eam latius persequar.

§. 82. Cognito, quales subinde ferat inflammatio eventus, si ipsa solida ossium fabrica insideat; ordinis ratio exigit, ut quoque, quam brevissime potero, ostendam, quomodo incendium desinat, in periosteo interiori, aut cellulosa ossium substantia si occultata proserpit. Inflammationem in hac membrana aliquando resolutione terminari, nullius dubii est, si illa præsto sunt requisita, quæ stasi humorum in vasis discutiendæ velificantur, non neglectis cæterum iis, e promptuario materiæ Medicæ depromptis salutaribus remediis, & convenienti methodo in tempore, tam externe parti incensæ admotis, quam interne adhibitis, quæ expectatissimum hunc resolutionis effectum secundant: desideratis vero his humorum dotibus, inflammatio in suppurationem abibit. Re autem vera hoc medullæ involucrium cum ipsa involuta medulla in abscessus transire, luculentis confirmatum dedit

dit testimoniis, ab experientia petitis, Celeberrimus PETIT, qui in spectabili ossis tibiæ cavo, eo terebra vulneraria pluribus locis perterebrato, insignem foetidi puris copiam deprehendit; argumento omni exceptione majori, non minus medullam, quam periosteum internum, subinde abscessibus corrumpi. Quod si autem puri huic concluso non satis mature via e suis carceribus erumpendi paratur, mali vis ex hac membrana brevi latius manat, & in circumductos parietes osseos se diffundit; unde ossi interdum caries accessit; quandoque autem singularis quædam cariei species nascitur, quæ Aurelio Severino *παιδαρθρονία* vocata est, aliis vero spina dicitur ventosa.

§. 33. Sunt, qui existimant, Spinæ nomen ortum inde suum traxisse; quod hoc morbo afflicti in interioribus laborantis ossis recessibus, spinæ velut peracutæ hære, & pungendo vehementes isthic movere dolores sibi videntur: ventosæ vero vocabulum ipsi eo adstrui: quia os ipsum valdopere tumefactum & spongiosum, quasi vento foret inflatum *p*). Quidam hanc ossium cotruptionem ad ossium cariem referunt *q*), alii vero eam malint exostosis annumeratam *r*). THEOD. ZWINGERVS hunc morbum cancrum ossium nuncupavit: PANDOLPHINVS vero ulcus cariosum. Est vero spina ventosa singularis quædam ossium caries, vel a periosteo interiori, vel ab ipsa medulla, vel ab utrisque corruptis exorta, & inde usque in circumseptum osseum munimentum propagata, quod insigniter inde intumescit, extuberat & veluti fungosum evadit lenteque exeditur. Est ea quidem complurium Medicorum cum citato SEVERINO communis sententia, hanc ossium afflictionem in nullos alios, nisi pueros atque adolescentes convenire; reliquis adultiore & provectiore ætate hominibus ejus plane exortibus atque immunibus. At vero Doctissim. GOHLIVS multis observationibus planum fecit, nec homines in hoc ætatis flexu hujus morbi cruciatibus esse exemptos, quamvis, experientia teste, pueri multo frequentiores hoc morbo conflictentur, quam ætate provectiores *s*). Hoc autem observatu dignum est, hanc ossium calamitatem nihil omnino in homines senectute confectos cadere: hujus rei ratio est, quod plurima vascula, quemadmodum in universum ætate ingravescente & præcipitata abolescunt & delentur; ita quoque in ossibus evanescunt. Haud quaquam itaque HEYNII sententiæ subscribere possum, diserte scribentis, omnem ætatem huic malo gignendo & alendo esse obnoxiam *t*).

§. 84.

p) MANGETVS *Biblioth. Med. Tract. Tom. 3. L. 13. p. 659.*

q) NVCKIVS *Chirurg. Experiment. XLVI. Exper. p. 313.* WEDELIUS *Dissert. cit. Cap. 1.*

§. 3. HEYNIVS *Libr. cit. Thes. XXXIII*

r) PETIT. *Libr. & Cap. cit. pag. 247.*

s) *Dissert. Epistol. de Spina ventos.*

t) *loc. cit.*

§. 84. Ut vero deplorati hujus morbi ingenium quam brevissime adumbremus, sciatur, hoc malo correptos initio de profundis, rodentibus, modo obtusioribus, modo lancinantibus & acerbioribus querimonias habere doloribus, in imis ossium medullis sævientibus, dicendo, sibi non aliter videri, ac si præacutæ spinæ in ipsis ossium penetralibus hærent defixæ, compungendo medullam urentes; aliquando autem quoque de doloribus conqueruntur in mollioribus ossi circumnatis partibus. Tum incipit pars ossis depravata lente inflari, extuberare inque latitudinem distendi majorem; ossis superficies exterior spongiosa evadit & velut pumicosa, quasi multis vermicibus foret arrosa & erosa, cum insigni inæqualitate, quæ in eo ab asperitate, in simplici carie obvia, diffidet, quod multis tuberculis & nodis obsita appareat, Excellentissimo BASSIO rectissime id monstrante ^{u)}; unde ipsis haud raro tanta suboritur fragilitas, ut levissima quaque occasione fracturas incurrant. Neque cunctatur diu hoc malum in ossium soliditate, sed latius manans brevi se, periosteum externo pereso, in circumjectas diffundit partes molliores, quas in tumores sæpe acerbius dolentes & furentes attollit, (quemadmodum Doctissimus GOHLIVS hoc pluries ita deprehendit, ^{x)} qui, vel sua sponte dehiscences, vel vulnerario scalpello reclusi, acrem ichorem uberius, quam pro ulcere, fundunt, male olentem & imposita ulceri emplastica plerumque denigrantem, quinimo in vicina carne cuniculos agentem. Ipsum vero carie infestatum os luxuriante carne obtegatur, quæ vulnerario specillo offensa, illico sanguinem stillat. Omnium vero maxime attendi meretur, ossa carie hac corrupta, GOHLIO id crebrius observante, si deglupta & nudata conspiciantur, nullo livore vel nigrore esse tincta, sed colore alba; quid? quod nec separata quidem atque extrusa ossis fragmenta peregrino colore esse infecta. Adhæc vim hujus mali usitatissime ex alio ad aliud os propagari, ita ut, radicibus ejus in uno osse vix evulsis estirpatisque, in aliis ossibus statim novas agere radices occipiat ac progerminare, observationibus illis, a Doctissimis GOHLIO & ZWINGERO de spina ventosa relatis, hoc ita manifesto arguentibus.

§. 85. Prima vero hujus acerbæ afflictionis, quæ ossa ita turpat funditusque evertit, semina in humorum massa hærent dispersa, unde ossibus, vel solidissimis, tantam inferunt perniciem. Consistunt vero hæc in sordibus salinis, acribus & corrodentibus, sanguini intermixtis, quæ, tam diu in amplioribus vasorum alveis cum purpureo latice circumaguntur, vix quicquam detrimenti corporis partibus inferant, quamprimum vero in vasa capillaria adigantur, in iis pedem figendo acerbitatis suæ virus in coercentes tubulos aliasque circumtextas evomunt partes. Attenta enim observatione in com-

perto

^{u)} Loc. cit.

^{x)} Dissert. cit.

comperto est, eos in primis exitiali hoc morbo tentari, qui, vel Gallicum morbum alunt, vel a parentibus, detestabili hac lue quondam inquinatis, procreati sunt; aut quorum liquida effoeta, acria & scorbuto corrupta sunt; item qui rachitide conflictantur. Observatum quoque est, ossa tum hanc cariem ducere, si achores, tinea, scabies, item materia podagrica, arthritica, rheumatica, aliaque salina, quæ jam e corporis interioribus in ejus habitum externum foras extrusa fuerant, indidem quomodocunque repelluntur, inque humorum massam de integro regeruntur. Neque insolens est hujus mali ortus a purgamentis illis acribus, post variolarum discessum in sanguine relictis, nec reiteratis alvi ductionibus aliaque commoda inde via penitus excretis. Quæ omnia quum sint tam clara, tam explorata, ut dubitari nefas sit; necessaria ex iis fuit consequentia, incunabula hujus calamitatis potissimum in acri quadam & arrodente liquorum sanguineorum indole esse posita.

§. 86. Hinc quoque est, cur HEYNIVS sibi habeat persuasum, spinam ventosam forte infaustam luis venereæ prolem esse: quia ante morbum Gallicum vix ulla hujus mali notitia fuisset y). A quo nec dissentit Laudatissimus GOHLIVS, diserte scribens, utique probabile esse, iis in morbis, qui *παιδαρθερον* viam sternunt prodeundi, venerei quid sublatere occultatum; nec eos quidem infantes, quibus achores, tinea &c. forent ab exteriori corporis circumferentia in liquidorum massam utcunque rejecta, hujus luis suspicione omnino esse absolvendos: ex centenis quippe pueris, vix unus alterve, a retroactis achoribus spinam reportaret ventosam, nihil ergo causæ subesse, quamobrem hi infantes, achoribus vel tinea percussis, inde hoc morbi genere excruciantur, cæteris omnibus, quibus tamen illa similiter retrocessere, ab eo immunibus & alio morbo correptis. Verum enim vero summo opere demiratus sum, Experientissimum hunc Virum sibi tam parum constare, quod paulo post, in genesi ventosæ spinæ enucleanda, ad peculiarem, nescio quem, apparatus delabitur inflammatorium, illam liquidorum acrimoniam (quam ipse tamen aliquanto ante verbis accusavit disertissimis,) ementitam agnoscens fictamque; quasi venereum in sanguine delitescens miasma in corrodentium & acrium numero non foret referendum: quæ quum inter se conciliare nequeam, alii videant, quemadmodum hæc repugnantia inter se conjungant. Mihi satis est hic ostendisse, acre salinum, in sanguine reconditum, vi sua rodente ossa ita deformare & destruere.

§. 87. Perspectis itaque diversis illis eventibus, quos periostei interioris, tam medullæ circumvoluti, quam forulos cellulosi opificii intus convestientis, inflammatio sustineat; non abs re quoque foret de illis quædam hic subtexere, quæ phlegmonæ accidunt, si in ipsius medullæ folliculis fuerit

G

suc-

§. succensa: at vero quum ex iis, quæ sparsim a nobis relata leguntur, nullo negotio intelligi possit, quales medullæ incensionem exitus maneant, actum profecto agerem, hoc loco molesta sedulitate repetiturus, quæ indidem facile cuivis pernoscantur. Satiùs itaque esse mihi videtur, hic loci pauca duntaxat ex iis degustare, quæ de gummatibus Gallicis, tophis nodisque jam supra §. 70. commemoravi, aliquibus videlicet rei Chirurgicæ cultoribus esse consuetum, dissonis hisce vocibus disjunctos inter se quoque tumores significare, eosque sollicitius a se invicem discernere; quum ex adverso etiam sint, qui iisdem indistincte & promiscue utuntur 2). Ante vero quam de dissidentibus his inter se tuberculis, in dura ossium crusta obnatis & visui occurrentibus, verba facere adior, convenit brevissime dicere, hos ossium tumores, tam indissolubili nexu arctaque Gallico morbo conjunctos esse propinquitate, ut hunc semper fidum habeant comitem; aut certe genus ducant ab ipso suum, etiamsi non ullum aliud hujus foedæ luis vestigium in præsentia compareat.

§. 88. Jam vero ad discrimen illud, quo a se invicem sejungi hæ excrescentiæ solent, breviter ostendendum aggredior. Gumma Gallicum est tumor præternaturalis, in externo ossium ambitu defixus & periosteo exteriori velatus, tenacitate sua & duritie ad gummi cujusdam similitudinem proxime accedens, (unde quoque pressus digitis cedit, & horum vestigia relicta ostendit,) lamellis osseis, ob lymphæ visciditatem in vasculis eas interluentibus subsistentis, a suo mutuo nexu paulatim dimotis, distractis inque altum elevatis, oriundus, qui substratum os lenta carie corrumpit, nec fere unquam abscedit. Tophi vero nomen ferre solet, si ipsius tanta est durities, quanta in cornibus vitulorum aut avium rostris, primo pullulascentibus, deprehenditur, ideoque durior est gummi Gallico. Exsurgit hic itidem, exterioribus ossium laminis, ob infarctas vasorum ipsis interjectorum propagines, a sua mutua cohærentia laxari sensim coeptis & discedentibus. Nodus tandem dicitur aliquibus hic tumor, si duritas ipsius superior est tophi soliditate. Prout itaque horum tumorum alius alio mollior est duriorve, diverso etiam nomine cieri solet, quamvis omnes ex uno eodemque emanaverint fonte, & ossium exteriori semper obsideant faciem. Frequentius in osse tibiæ egerminant; rarius in aliis ossibus, cave tamen ne credas, alia ossa calamitate hujus morbi esse prorsus exempta, experientia contrarium docente 3). Sunt præterea excrescentiæ hæ tristissimis subinde doloribus stipatæ, qui, appetente potissimum nocte, surgunt sæviores atque efficiunt, afflictos noctem ducere insomnem; quandoque vero propemodum indolentes observantur. Magnitudine sæpius ovum columbinum æquant, haud vero insolenter hujus magnitudinem excedunt altiusque se ab ossis superficie attollunt. Quid denique discriminis intercedat tumoribus hisce cum sic dictis

2) BONETVS *Polyaith. Tom. III. Cap. XXXIV. §. IX.* FRAN. SYLVIVS *loc. supra cit.* CLOPT. HAVERVS *Libr. cit. Serm. II. Cap. IV. §. 120.*

3) PYRMANNVS *Chirurg. curiosa. Part. II. Cap. XXII.*

ctis exostosis, ex iis apparet atque exstat, quæ in antecedentibus habentur explicata. Enim vero minus quoque inusitatum est, hæc ossium tubera socieatatem quandoque cum ipsis exostosis inire, & viribus conjunctis osseam soliditatem invadere, quemadmodum ex RVYSCHII observationibus in propatulo est, ubi tophus ossis tibiæ munimentum a foris obsidet, exostosis vero idem intus tenet occupatum *b*).

§. 89. Ex illis igitur, quæ de vera inflammationis natura & indole; de ossium fabrica; & ipsis tandem morbis eorum hucusque recensui, luculentissime patebit, ossa non minus, quam cæteras omnes corporis partes, inflammationibus & concipiendis, & alendis, esse apta atque accommodata, morbis ipsis, ex incendio prævio nasci semper solitis, inque ossium partibus tam crebro repertis, hoc quam optime & manifestissime demonstrantibus. Plura profecto superessent, digna, quæ illustriore hic loci & latiore declaratione B. L. oculis mentique subjicerem: at vero quum, periclitandi ingenii gratia, hæc mihi duntaxat fuerint elucubranda, nec ego animum induxerim dissertationis modum excedere, pervelim, B. L. hæc pauca, quantumvis non ita terfa, ornata atque omnibus numeris absoluta, ut se ipsi forte probatura sint, æqui tamen bonique consulat. Voti hujus compotem ut me sit facturum, tanto facilius mihi persuadeo, quanto magis æqua animi lance expenderit, quot quantisque tricis, inexplicabilibus fere nodis & difficultatibus ossium mala, etiamnum implicata, abdite lateant, meaque adolescentis, hoc in argumento nondum exercitati, studia & conamina, tot perplexis morbis ex tenebris eruendis & ita explicandis, ut omnium puncta ferant, non esse suffectura. Optandum, itaque magis, quam sperandum, esset, ut ii, quibus occasio est ejusmodi ossium morbos suis oculis usurpandi, horum causas ac formam impensiori studio explorarent, easque recte literis consignatas cum Medico orbe communicarent; quia inde plurimum luminis obscuris ossium morbis accenderetur. Meum denique etiam foret, ut hoc loco Therapiam horum morborum, Medicam perinde atque Chirurgicam, subjungerem: verum hoc pacto vix exitum tam patentissimi differendi campi invenirem. Placet ergo hic filum mei de ossium inflammatione sermonis abrumpere & huic diatribæ ita imponere.

F I N E M.

b) *Theſaur. Anat. X. Aſſer. II. No. CLXXVII. & CLXXVIII. Tabul. II. Fig. IV. V. IX.X.*

MENDA QVÆDAM ITA CORRIGENDA.

Pag. 15. lin. 17. lege vel in ulcera. pag. 16. l. 20. leg. venerandi pro venerandus. pag. 17. l. 18. leg. vacante pro vante. pag. 18. l. 33. leg. evincit. pag. 21. l. 15. leg. contuenti. Ibid. l. 29. leg. compluribus. pag. 26. l. 2. leg. acri quadam. pag. 32. l. 35. leg. liquoribus pro liquidis. pag. 34. l. 19. leg. relata pro relara. Ibid. l. 23. leg. causas pro causæ. Ibid. l. 25. leg. exitiabili. pag. 36. l. 33. leg. obsessum. pag. 37. l. 30. leg. resistendi pro resistendo. pag. 39. l. 26. leg. frustra pro sustra.